





Rojava Rojhilat e

Kurdistan yek welat e

Di vê hejmarê PolitikArtê de em bi rewşa li Rojavayê Kurdistanê dadik-evin. Luqman Guldivê çavdêriyên xwe yên li Rojava di dema êrişên topyekûn ên desthilatdariya HTŞ'ê ya li Şamê de nivîsîn. Ew nexasim jî seferberiya xelkê Rojavayê Kurdistanê û hestên yekîtiya neteweyî û welatparêz ên xelkê Kurdistanê derdixe pêş. Di nivîseke din a li ser destana Ehmedê Şeng de Luqman Guldivê berê xwe dide têgeha sînorê di navbera Dodikiyên Kurd û Gêsanên Ereb de. Ew balê dibe ser wê yekê ku Çiyayê Evdilezîzê yê li Heskê mekanekî sînor e û sî-

nor di destanê de weke mekanekî danûstandinê hatiye avakirin. Gava Gêsan mêvan bin, Dodikî mîameleya mêvan bi wan re dikin, gava dibin diz û talanker dibin neyar û gava kuştinê dikin jî dibin dijmin. Ev destana kêr tê nasîn, destanek e li ser têgeha sînor a di navbera eşîrên Kurd û Ereb de. Xwendekarê Zanîngeha Kobanê Fetah Îsa jî bi gotara nefretê ya li dijî Kurdan dadikeve û nimûneya wî hesabekî facebookê ye. Bi rêya vî hesabî ew nîşan dide ka çawa nefreteke giran li dijî Kurdan li Sûrî tê belavkirin. Mamosteya Zanîngeha Kobanê Firyaz Berkel bi wê yekê dadikeve ka mirov çawa

xwendekaran teşwîq bike da ku di nava çalakiyên li kampûsa zanîngehê de cihê xwe bigirin. Xwendekara Zanîngeha Kobanê Nadiya Hisên jî bi meseleya şideta devkî li dibistanan daketiye û berê xwe daye xwendekarên pola 9'an ên li Kabanê. Xwendekara Zanîngeha Kobanê Dilber Umer bi bûyereke dîrokî, şerê Bedirxan Begê li dijî Seîd Begê Dasinan daketiye û bédengiya di nava wê-jeya devkî ya Kurdî de ya beramberî vê bûyerê şirove dike. Berdevkê KCK'ê Zagros Hîwa jî ji bo meseleya dawî ya li Îranê nexasim jî Rojhilatê Kurdistanê nixand.

PolitikART

Yek e yek e yek e gelê Kurd yek e

Luqman GULDIVÊ

Piştî çend mehan dîsa li Hilêliyê me. Hilêliyê yek ji taxên Qamişloyê yên herî welatparêz e. Zanîngeha Rojava jî li wê taxê ye, zanîngeha ku xwendekarên min lê dixwînin. Li duriyan û çarriyana dîmenên seferberiyê hene. Hê Hilêliyê û temamê Qamişloyê evqasî seferber nebûbû. Her komun û her tax bi ciwan, gihiştî û navseriyên çekdar ên ku taxên xwe kolanên xwe diparêzin tîjî ye. Xelk jî vê rojê bi alayên xwe yên rengo rengo, ji alaya Tev-Demê heta bi yên YPG û YPJ'ê, ji alaya herêma Kurdistanê heta bi rengên kesk û sor û zer, li meydanan, li duriyan, sêriyan û çarriyanan piştî van xwebexşên seferberiyê digire. Li dijî wê tirs û xofa ku hêzên çete yên bi fermanariya Şamê dixwestin bixin dilê gel, ew bi mihricaneke xweparastinê bersivê didin: Mihricana Serketina Welatparêziya Kurdistanê belkî jî Mihricana Şoreşa Welatparêziya Kurdistanê. Bi hezaran kes li Qamişloyê tevî seferberiyê bûne. Hîna min ti carî şahidî li ev qas çekdarên nava bajarên xwebexş nekiribû. Brahim ê li cem min, dibêje, "Em xwebexş in, lê em neçar in xwebexş jî bin. Divê em zarokên xwe, malbatên xwe û kerameta xwe biparêzin. Em çawa bihêlin ku talanên me rakin!"

Hêza yekîtiyê berê nedîtî hişt ku ji xwe bipirsim, gelo Kurdan toqa wê bêbextiya bêtifaqiyê ya di stûyê xwe de şikand? Hêvîdar im ku wan ew toq şikandibe. Hêviya xelkê jî ew e ku Şoreşa Welatparêziya Kurdistanê bi ser bikeve. Dînekî Hilêliyê heye, berê jî bi çend alayan digeriya, alaya ku li ser wêneyê Abdullah Ocalan û ya li ser wêneyê Mesûd Barzanî jî heye di destê wî de ne. Ji bilî wan, alayên YPG û YPJ'ê jî pê re ne: "Yek e, yek e, yek e, gelê Kurd yek e." Ew hin dijûnan jî dike, ne yên nû, lê li rewşa dînbûna wî tîr û xelk lê nagire.

Kî li dora van şervanên xwebexş e? Kal û pîr, jin û mêr û ciwan û zarok, xweş û nexweş, hema her Kurda/ê li Qamişloyê! tevahiya Kurdên bajarên Rojavayê Kurdistanê piştî seferberbûyiyên xwe digirin. Li cebhê hin ciwanên Rojavayî yên ji Ewropa û Başûrê Kurdistanê yên xwedî tecrûbeya şer jî hebûn, lê nexasim ciwanên Başûr yên hatin moralê xelkê bilind kirin. Êdî di nava xelkê de bûye weke sloganeke nû: Moral hezar e!

Lê vê hevgerîna xwe dispirtê eşeke mezin ya berê nedîtî. Di vekîşîna ji Dêr Hafir û Meskene de êrişî dema vekîşîna li gorî lihevkerîna, bû armanca çeteyan û aliyên xiyaret bi hêzên Kurd re kirin. Vê yekê rê li ber koçberbûna bi dehhezaran kesan vekir û ez ê paşê kite bi kite behsa hin şahidî û bûyerên elaqedar bikim, gava ez behsa serdana xwe ya Nexweşxaneyê Şehîd Xebat bikim.

Xalo wêneyê min bigire!

Bi herhalî seferberiya li tevahiya bajarên Kurdan, herî baş xwe li komuneke Hilêliyê nîşan da. Xelkê komunê agirê xwe di nava fiçiyê teneke de pêxistibû, jin û mêr, kal û pîr, ciwan û zarok diçûn û dihatin vî cihê nobetê. "Em ê heta dawiyê taxên xwe biparêzin", slogana wan a sereke bû. Piştî komkujiyên li Heleb, Dêr Hafir, Tebqa û Reqayê, baweriya xelkê tenê bi sîlehên wî tîr û xelk dibêje, heta dawiyê ew ê xwe bipar-

■ **Fermandarê komandos Givara: Xiyaneta Emerîkiyan hiç xem nake, em dizanin ew zilamên berjewendiyên xwe ne. Lê bênanûxwêbûna wan, em ê ji bîr nekin. Em Kurd bi kê re nan bixwin, em xatirê wê nanxwarinê jî bîr nakin. Lê ev eskerên Emerîkî yên ku me heta doh bi hev re nan dixwar, niha ava me jî venaxwin.**

■ **Beriya vê êrişî qirkirinê, li Silêmaniyê ez bi kê re dipeyivim, digot, hêviya me Rojava ye. Ev êrişî li dijî hêviya wan, ew jî seferber kiribûn. Herî zêde ya cihê kêfxweşiyê jî ew e ku bandora Birayên Misilman yanî tevgerên 'ixwanî' yên bi piştgiriya ji Tirkîye û ji Qeterê li Başûrê Kurdistanê şikest.**



rêze. Ez ne weke rojnamevan çûbûm, ji ber wê min wêne negirtin, lê min tenê wêneyek girt. Keçeke piçûk 3-4 salî hat cem min û got, xalo min teswîr bike, li cem wê jî kurekî 7-8 salî hebû yê ku alayê herêma Kurdistanê rakiribû. Min wêneyê wê girt, lê gava li min dinihêrî, xemgîniyê nediyariyê yan jî belkî westa seferberiyê ya wan çend rojan di rûyê wê de ji diyar bû. Jixwe, jineke li taxê jî eşkere got, "heta sibehê em bi nobetdarê xwe re şiyar in tevî zarokên xwe. Em çayê, qehwê jî wan re tinin, em xizmeta lazim dikin."

Li cem wan xortikek hebû, ez pê re bi Kurmancî peyivim:

- Em Kurd hemû bûne yek.
- Erê wele, wilo ye.
- Gelo Erebb jî hene di nav me de.
- Nizanim, ez dibê, nînin.

Brahim ê li cem min, hêdîka kenîya. Xêr e? Tu nabêjî, hevalê wî yê zaroktiyê ye û ji dema seferberiyê û vir ve ew jî di nava wan de ye, hem nobetê digire û hem jî dizane ji bo Kurdan ev meseleya man û nemanê ye. Lê ew bi eslê xwe jî Erebbên eliyê Til Hemîsê ye. Li nava Kurdan hatiye dinê û weke wan rabûye. Tirs û xofa wan û man û nemanê wan, yên wî ne jî, ew jî weke cîranên xwe hîs dike. Li bereya Sefa minê ev Erebbên Rojavayê Kurdistanê çêtir nas kiriba: Xwe tevayî Kurdan dikin.

Birîneke giran jî li Başûr dikewe

Ev seferberî li Başûrê Kurdistanê jî hebû. Beriya biçim Qamişloyê, ez li Silêmaniyê bûm û ruhê seferberiyê yê li Silêmaniyê bê mibalexe di dîroka piştî 2003'yan û vir ve cara ewilî bû ku evqasî kurdewar û evqasî zindî bû: Ruh bi Kurdbûna başûr hat. Sedemên

vê yên jeopolîtîk û civakî gelek in, lê ez ê van sedeman bi hevokê îfade bikim. Beriya vê êrişî qirkirinê, li Silêmaniyê ez bi kê re dipeyivim, digot, hêviya me Rojava ye. Hêviya li Başûrê Kurdistanê hem ji bo elîtên rêveber û hem ji bo xelkê Rojava bû. Ev êrişî li dijî hêviya wan, ew jî seferber kiribûn. Weke dostekî gotî, du nîfşên din ên Başûrê Kurdistanê jî nû ve hatin ser xwe û bûn parçeyekî neteweya xwe. Herî zêde cihê kêfxweşiyê jî ew e ku bandora Birayên Misilman yanî tevgerên 'ixwanî' yên ji Tirkîye û ji Qeterê li Başûrê Kurdistanê şikest. Yek ji birînen Kurdan û Kurdistanê dikewe û rehet dibe.

Fermandar Givara û 2000 komandos

Ez li Heskê çûm Hepsa Sînaî ya ku girtiyên DAIŞ'ê lê ragirtî bûn. Li aliyê me yê çepê, li wî aliyê dîwêr, avahiyeke çar qatî xuya dike, li kêleka wê avahiyeke din heye ku qulo-pilo ye. Ew avahî jî avahiyên kevin ên hepsê ye. Gava çeteyên DAIŞ'ê sala 2022'yan jî derve ve êriş birin ser vê hepsa li taxa Xuwêran a li Heskê, çeteyên li hundirê hepsê jî serî rakiribûn û di şer de tevahiya avahiyên hepsê hilweşiyabûn. Tenê ev avahiya qulo-pilo li ser piyan maye, lê nayê xebitandin. Avahiya çar yan jî pênc -ji ber diwarê di biwarê de baş nizanîm- qatî piştî 2022'yan hatiye çêkirin. Li hepsê qedere 7 hezar DAIŞ'îyan hene. Li serê banê avahiyê Emerîkî tevî alaya xwe bi cih bûbûn û haziriyê vekîşandina çeteyên xwe yên DAIŞ'ê dikirin. Dûyekî stûr carekê ji avahiyê çû, heval Brahim ê jî YPG'ê -Brahim gelek in li Rojava- gava em ji hepsê veqetiyên wê ji min re bigota, "betanî û cil û bergên wan -DAIŞ'îyan-dişewitînin".

Heval Givara fermandarê 2000 komandosê li derdora hepsê ye. temenê wî 29-30 sal in, yanî weke generalekî ciwan e. Wî got, "Xiyaneta wan hiç xem nake, em dizanin ew zilamên berjewendiyên xwe ne. Lê bênanûxwêbûna wan, em ê ji bîr nekin." Ez xweşik berneketim, lê wî paşê ta bi derziyê ve kir: "Carê me bi hev re nan dixwar, silav li hev vedigerand. Em Kurd bi kê re nan bixwin, em xatirê wê nanxwarina bi hev re ji bîr nakin.

Lê ev eskerên Emerîkî yên ku me heta doh bi hev re nan dixwar, niha ava ku li avahiya wan heye jî venaxwin. Helîkopter avê ji wan re tînin datînin ser ban û hewşa hepsê."

Hevkariya di şerê li dijî DAIŞ'ê de jî li gorî fermandar Gîvara êdî bi temamî nemaye. Ew dibêje, tevgera şaneyên DAIŞ'ê heye û hêzên Koalîsyonê û nexasim ên Emerîkayê vê tevgerê dibînin û dişopînin, lê êdî ti agahiyê bi wan re parve nakin.

Kenekî sivik li ser rûyê fermanदार Gîvara e. Ji me re dibêje, çeteyên DAIŞ'ê ji hepsan werin vekîşandin, komandosên wî jî wê rehet bikin, karibin di şerê li dijî Kurdan de miletê Kurd biparêzin. Di nava şervanên wî de Ereb jî hene, ji ber wê gava dibêje "şerê li dijî Kurdan" berê xwe da yekî ji wan û bişîrî. Ew jî pê re bişîrî. Her kes dizane, ev şer ji bo Kurdan ên man û nemanê ye.

Hena neviyê Henayê Heydo ye!

Roja beriya wê min li Qamişoyê Hena dît, femandarekî hêzeke piçûk a YPG'ê yê bi eslê xwe Suryanî. Li gorî dibêje, ew ji neviyên femandar û destbîrakê Elikê Betê, Şemûnê Hena Heydo ye. "Ji zarok mezinan, me hemûyan rahiştîye ti vîngê. Êdî mesele xîreta me ye. Em û ew in". Suryaniyekî gava digot, "em û ew in", xwe tevayî Kurdan dikir. Gelek Erebên Rojavayê Kurdistanê jî êdî di vî şerê man û nemanê de xwe tevahiye Kurdan kirine.

Ev "em û ew in", li seranserê bajarên Kurdan ên devera Cizîrê dihat gotin. Em dîtira rojê çûn xeta cebha pêş jî, li ser bereya şer a li rojavayê Til Berek û Rojhilatê bajarê Heseke. Femandarê nuqteya em lê Gewran jî Suryanî bû: "Xeta di navbera me û wan de gundên Kurdan in û çend gundên Ereban jî li aliyê me hene." Wê keliyê du helîkopterên Emerîkî di ser me re firiyên. Piştî wê, balefirek firiya çû. Lê wê balafirê keliyêkê rê li ber kelecana û hereketekê vekir: Gelo droneke Tirkan e?

Ew ne drona Tirkan bû, lê droneke Tirkan jî hebû. Çawa dîtîbû ku çûnûhatin li wê nuqteyê çêbû, xeber dabû çeteyan û çeteyan jî bi dronên xwe li wê nuqteyê xist, yek ji şervanên Ereb ê li nuqteyê birîndar bû. Nûnerê ragihandinê yê bi me re em ji cihê êrişê dûr xistin.

Komkujiyên mezin û penaberîya pîrçarî

Ez ê paşê li cebhê vegerim, lê bêtîrê şerê dijminahî û xiyane-tê bi Kurdan re çêkiriye, em nikarin li hestiyariya neteweyî û yekbûnê ya Kurdan serwest bibin. Em li dibistaneke nêzîkî navenda bajêrê Qamişloyê ne, hema sed metreyekî dûrî Mizgefta Zeynel Abidin a Qamişloyê -li Nisêbinê jî bi heman navî mizgeftê heye- ye. Di refekî dibistanê de bi dehan kes rûniştine, tevî zarokan. Elektrîk ji dema ku Şamê bendav xistine destê xwe û vir ve, qut bûye. Gava em hatin, xêrxwazekî mazot şandibû da ku penaber xwarina xwe pê çêkin û xwe pê germ bikin.

Em li refê li ser merşekê rûniştin. Berdevkê komuna penaberan agahî dan me: 497 penaber li vî dibistanê dimînin bi giştî 99 malbat. Tevahiya dibistanên Qamişloyê bûne stargeh ji bo penaberên ku ji Tebqa û Reqayê koçber bûne. Li hinekan jî penaberên ji kampa Waşokanî ya Heseke bi cih bûne. Penaberên ji Serêkaniyê yên li kampa Waşokaniyê, ji ber ku xwe ewle hîs nekirine, hinek jê li dibistan û mizgeftên Qamişlo bi cih bûne.

Her kes herî kêm du caran penaber bûye, lê hinek jê ev cara çaran e ku penaber dibin. Ew penaberên ji ber dagirkeriya Tirkiyeyê ji Efrînê filitîne, pêşî li Şehba, paşê li Tebqa û niha jî li Qamişlo û Dêrikê bi cih bûne.

Şervanan canê xwe feda kir

Jineke ji Efrînê ya kezêşewitî behsa keliyên komkujiyê



dike: "Ji her deverî ve êriş birin dbistana em weke penaber lê bi cih bûbûn. Hucreyên veşartî û hêzên hikûmetê bi hev re. Qiyamet bû li ser serê me. Me derî li ber xwe girtin û xwe di dibistanê de asê kir. Piştî sê saetan wan êdî xwe ji dîwaran qevazt û derî jî şikandin. Wê keliyê heval bi me ve gihîştin, rêyek jî me re vekirin. Ji wan hevalan 8, gava ku em xilas kirin, şehîd bûn. Di rê de jî gelek heval û xelkê sivil şehîd bûn. Du seriyên jêkirî yên ku six di guhên wan de çikandî di deriyê ketina Tebqayê de bi cih kiribûn, yên jinan bûn. Tade û eziyet li sê cenazeyan jî dikirin."

Ew di romorkê de ye û serê wê romorkê bi kon yan jî çadirekê girtiye. Ji ber ku dilê wê dixele ji neçarî serê xwe derxistiye û şahidî li van bûyerên li ketina bajarê Tebqayê jî kiriye.

Lê ew ne tenê ye. Li Kampa Newrozê ya li Dêrikê jî Ehmêdê ji Efrînê jî me re got, gava ew ji Reqayê veqetiyaye, çeteyan ew sekinandîye: "Kêr danî ser sînga her du zarokên min ên 5 û 6 salî. Ji me re gotin, em dizanin hûn Kurd in û em dizanin hûn bi ku ve jî diçin. Em ê bîn û we li wir jî bikujin. Zarokên min di van konên her roj av dide bin, bi şev şiyar dibin û dipirsin, gelo hatin bavoy?"

Li Nexweşxaneyê Şehîd Xebat a li Qamişloyê jî yekî ji birîndaran got, "Ez bi van birînen giran filitîm, lê hê jî haya min ne ji hevîna min ne jî ji du zarokên min heye". Birîndarên esker jî behsa wê yekê dikin çawa bi xiyane-tê û kemînen dema lihevkerîne gelek ji wan birîndar kirin û gelekên din şehîd kirine.

Şerê li Rojavayê Kurdistanê jî ber vî yekê, eşkere şerekî man û nemanê ye, hem weke şerê çekdarî û hem jî weke mizakereyên bi hikûmeta navendî re.

Şervan hemû fedayî ne

Li Heseke em bi Berdevkê YPG'ê Siyamend Elî re peyvîn. Wî jî got, êdî ew li Rojava ne, vekîşiyane erdên Kurd lê pîr-ranî. Ew ê nuqte bi nuqte gund bi gund şer bikin. Wî got, ew jî pê dizanin ku ev şer ê man û nemanê gelê Kurd li Rojavayê Kurdistanê ye.

Piştî şerên giran ên li gundê Sefa yê ser bi Çilaxa ve me berê xwe da Çilaxa jî da ku em karibin herin ser xeta bereyê ya şer. Lê şer, ne şerê caran e. Em nikarin xwe bigihînin bereyê. Li nava bajêr, me xwe bi rengekî xist bela serê çend şervanan. Wan em birin nuqteyekê ku lê qederê 10 şervan hebûn. Şervan hemû berê wan li xeta bereya şer e. Tevî ku hinek jê birîndarê şerê wan 3-4 rojan jî bûn, li bendê bûn vegehin bereya şer: "Ev der xaka me ye. Lazim e em bi tevahiya hêza xwe biparêzin. Ev çete dikevin ku talanê radikin, kerameta xelkê binpê dikin." Miheme, ev gotinên xwe qedandin û li ser pîrsa min jî got, ew jî xelkê Çilaxa ye:

- Tu weke Kurdê Çilaxa, tu wê li dijî çeteyên DAIŞ'ê û Şamê kerameta xelkê xwe biparêzi?

- Ez ê weke Erebê Çilaxa kerameta xelkê xwe yê deverê biparêzim.

Yekitiya Kurdan û seferberiya wan xisleta sereke ya vî şerê man ê nemanê ye. Lê Ereb û Suryaniyên Rojavayê Kurdistanê jî xwe ji miletên Kurdistanê dibînin û xwe tevayî ve seferberiya Kurdistanê kirine ji bo parastina xak û kerameta miletê Kurd.

Ha niha bi vî birînê ez ê biçim bereyê

Li Çilaxa şervanan çayêke tarî danî ber me. Min jî, Brahimê şifêr jî, me rahişt çaya xwe vexwar. Sobeyêke mazotê ew odeya tarî û teng di wê roja şiliyê de germ dikir. Berê awirê min çû ser birîna lingê şervanekî:

- Navê te bi xêr?
- *** Ereb.
- Tu kengî birîndar bûyî?
- Pêr li gundê Sefa, li ser xeta bereya şer.
- Çi qewimî? Gule li lingê te ket?
- Nexêr, êrişa bi dronê bû. Du hevalên ji Ronahî TV li bereya şer bûn. Gava dijminan bi çend dronan êriş kir, me sisê dan erdê lê yek jê filitî û berê xwe da wesaita hevalên rojnamevan ên Ronahî TV'yê. Ji bo ku wan hişyar bikim û her wiha dronê bînim xwar, min lê reşand. Guleyek li dronê ket, ji ber wê dron beriya bigihîje hedefa xwe, kete xwarê. Lê bi teqînê re çend parçe li min ketin. Birîna giran lingê min e. Birînek li ser paqa min heye û birîneke din jî heye, parçe li piştê min ket.
- Xwedê bi silameti bike. Tu ji Erebên Çilaxa yî?
- Mala te ava. Nexêr, ez ji Riyadê me.
- Riyad, yanî paytexta Siûdî?
- Erê wele.
- Tu wê niha çi bikî?
- Heger heval niha bihêlin, ez ê biçim bereya şer. Nehêlin jî piştî sê çar rojên din, ez ê karibim li ser xwe bimeşim, ez ê bi xwe biçim.

Ev şervanê ciwan, ji paytexta Erebistan Siûdî, piştî dagirkeriya dewleta Tirk a li dijî Efrînê, hatiye û xwestiye bibe parçeyek ji Şoreşa Rojava. Niha di nava seferberiya Kurdan a ji bo parastina Rojava de li bereya herî pêş şer dike. Ev îrade Kurdan dike yek deng, dostên wan eşkeretir dike û dijberên wan jî neçar dike ku bi wan re li ser maseyê rûnin.

*** Ji ber ku nexwest ez navê wî binivîsim, ez li vir navê wî nanivîsim.

Gotara nefretê li dijî Kurdên Sûriyê di medyaya dijital de

Mînaka hesabê 'AL-Raqqa tuzbeh bîsemit'

Fetah ÎSA*

Medyaya dijital, bi amûrên xwe yê berfirêr ên danûstandinê yê mîna platformên medyaya dijital, neynikek e ku aloziyên civakî û siyasî nîşan dide. Lê belê, ew di heman demê de jîngeheke berdar e ji bo belavbûna awayên nû yê dîrxistina ji hev a komên civakî û dijminahiya di navbera wan de jî.

Yek ji dijwariyên sereke yê ku civakên cihêreng bi wan re rû bi rû ne, diyardeya gotara nefretê ye ku bi taybetî komên hindikahî yan yê ku mexdûrên marjinalîzekirina dîrokî ne, dike armanc. Kurd yek ji wan neteweyên hindikahî ne li Sûriyê yê ku li hawîrdora dijital herî zêde rastî gotara stereotîpîkirina nerênî û provokasyonên tîn. Ev yek heta bi avakirina gotareke nefretê ya eşkere diçe ya ku bandorek nerênî li ser nasname û ewlehiya wan a civakî û derûnî dike. Tevî zêdebûna eleqeya cihanî li ser diyardeya gotara nefretê, lêkolînên taybetî yê ku amûrên analîtîk ên kûr bi kar tînin ji bo lêkolîna gotarê nefretê ya nexasim li dijî Kurdan a di medyaya dijital de hîna sîncor in.

Çarçoveya teorîk û metodolojîk a lêkolînê

Em li vir, li gotara nefretê ya li dijî Kurdan a di naveroka hesabê 'Al-Raqqa tuzbeh bîsemit' a li ser malpera Facebookê dinîhêrin. Giringiya lêkolînê ji hewcedariya şopandin û belgekirina vî gotarê bi awayekî metodolojîk tê. Bi vî, em dikarin wêneyekî rewşê yê zela bidin aliyên peywendîdar da ku tedbîrên pêwîst bigirin.

Em ê ji xwe bipirsîn, ka çî şewaz û peyv di gotara nefretê ya li dijî Kurdan de di vî hesabî de tîn bikaranîn. Kîjan kategoriyên sereke yê gotara nefretê tê de hene: provokasyonên rasterast, stereotîpîkirina nerênî, tinazê xwe pêkirin, û wekî din. Gava me ev kir em ê berê xwe bidinê ka gelo ev gotara nefretê ya li dijî Kurdan xwe bi giranî disîpêre gotinan (devkî û nivîskî) yan dîmenan (wêne û vîdyo). Li vir di heman demê de wê muhim be ku berê xwe bidin mîqdara û pîrcarkirina wan peyv û hevokên ku nîşana nefreta li dijî Kurdan in jî.

Sê hîpotezên min hene, ya yekê ew e ku ev gotara nefretê bi giranî li ser mijarên siyasî û neteweyî yê weke mijarên nasnameyê disekine, ne li ser mijarên civakî an aborî, ya diduyan jî ew e ku stereotîpîkirina nerênî şewaza herî berbelav e di vî gotara nefretê, jixwe li pey wê jî provokasyonên rasterast a tundûtûjiyê tê. Hîpoteza min a dawiyê jî ew e ku tîkiliyêke statîstîkî ya giring di navbera xwezaya naverokê û tundiya gotara nefretê de heye.

Têgeh û agahiyên giring

Gotara Nefretê li vir ew gotar e ku êriş dike, teşwîqî cudakariyê dike, yan jî navûdengê kesekê/î yan komekê li ser bîngehê nasnameya wê/wî ya neteweyî, qewmî, olî û wekî din reş dike. Di vî çarçoveyê de ji bo vî lêkolînê gotara nefretê li dijî Kurdan jî her naverok e - çî nivîs, wêne, vîdyo, çî jî şîrove - ku li ser hesabê facebookê yê 'Al-Raqqa tuzbeh bîsemit' de hatiye weşandin yan ku tê de heqaret, provokasyon, yan jî stereotîpîkirina nerênî li ser bîngehê aidîyeta qewmî/neteweyî ya Kurdan heye, û armanca wê ew e ku dijminahiye çêke yan jî Kurdan piçûk bixe.

Peyva gotara nefretê car pêşî di medyayê de li

■ **Sorkerên sereke yê gotara nefretê aliyên siyasî û leşkerî yê tîkildarî arîşeya heyî ne, û ne cûdahiyên çandî yan civakî. Ev yek, gotara nefretê vediguherîne amûreke ji bo şer û pevçûnê, lê ne îfadekirina cudahiyeke civakî.**

Dewletên Yekbûyî yê Emerîkayê (DYE) di sala 1989'an de derket. Tê de pîrsîrêkên tîkildarî gotara nijadperest a ku bi qanûna parastina azadiya derbirîne hatibû parastin, hebû.

Kurd bi xwe, ew hindikahiya qewmî ya herî mezî in li Sûriyê û qedere jî sedî dehê nifûsa wê pêk tînin. Piraniya wan Misilmanên Sunnî ne, hin jî wan Êzîdî ne, wekî din hejmareke pîr kêm a Mesîhî û Elewîyên Kurd jî heye. Piraniya Kurdan li Sûriyê li parêzgeha Heskê li bakurê rojhilatê Sûriyê, li Qamişlo û Amûdê, û li du bajarokan, li parêzgeha Helebê li bakurê Sûriyê li Kobanî û Efrînê û derdora wan dimînin. Kurd li van deveran pîrrianiya xelkê pêk tînin.

Kurdan li Sûriyê bi sedsalan e ku hene, û wan di serdemên dîrokî yê cuda de beşek ji avahiya demografîk pêk anîne. Zilm li Kurdên li Sûriyê, bi taybetî di bin serweriya Partiya Beesê de hat kirin, nexasim jî tîkildarî mafên wan ên sîvil û çandî. Di dema Şoreşa Sûriyê (2011-2025) de hêzên siyasî û eskerî yê Kurdan yê herî navdar bûn Yekîneyên Parastina Gel (YPG) û Partiya Yekîtiya Demokratîk (PYD), wan deverên berfireh li bakur û rojhilatê Sûriyê kontrol kirin. Wan damezrandina "Rêveberiya Xweser" (ya ku bi navê "Rojawa" tê nasîn) ragihandin, da ku saziyeke îdarî ya ku xwedî xweseriyeke rastîn e, pêk bînin.

Herçî tîgeha stereotîpîkirinê ye, gava li vir ez dibêjim, stereotîpîkirin, ez behsa girêdana Kurdan bi taybetmendiyên giştîkirî yê nerênî yê diyarkirî dikim: çavbirçîtî, xayîntî, sîxurî.

Ez provokasyonê jî weke banga eşkere yan neyekser a bi rêya weşanên hesabê facebookê jî bo dîrxistin, êrişkirin, yan girtina tedbîrên cezakirinê - çî siyasî, civakî, çî jî fizîkî - li dijî ferd yan jî komên Kurd pêname dikim.

Nimûneya lêkolînê

Hesabê facebookê yê bi navê 'Al-Raqqa tuzbeh bîsemit' nimûneya lêkolînê ya diyarkirî ye, û hemî weşanên wê li xelkê vekirî ne. Me Qerta Analîzkirina Naverokê weke amûra sereke bi kar anî ku bi rêya tabloyeke birêkûpêk daneyan ji her weşanê bi awayekî metodolojîk tomar dike û wan vediguherîne daneyên ku dikarin bîn analîzkirin. Me tenê berê xwe da vî hesabê 'Al-Raqqa tuzbeh bîsemit' ê li ser platforma facebookê. Me li tevahiya parvekirinên vî hesabî yê Çiriya Pêşîn a sala 2025'an nihêrî. Me her wiha berê xwe da şîroveyên li ser van parvekirinan hatine kirin jî.

Teoriya çarçovekirinê û analîza naverokê

Teoriya çarçovekirinê yan jî teoriya çarçovekêşiyê jî bo şîrovekirina ka wêneyê Kurdan di peyamên nefretê de çawa tê avakirin û çêkirin me bi kar anî, ji bo wan parvekirinên ku ew bi taybetmendiyên xas ên fena "xeterî", "sîxurî", "cudaxwazî" tîne çarçovekirin da ku tîgînên nerênî zêde bikin û dijmi-

nahiyê li hember wan rewa bikin.

Weke rêbaz jî me naveroka van parvekirinan analîz kir. Ji bo lêkolîna nimûneyên nivîs, wêne û dîmen wesfî guncaw e. Ew destûrê dide ku em karibin daneyên çendanî (peyvêk çend caran hat bikaranîn?) bi dest bixin lê her wiha em dikarin di heman demê de daneyên çawanî (maneya peyvê û motîvasyonên li piştê çî ne?) jî bi dest bixin.

Encamên pratîkî yê lêkolînê

Bi awayekî eşkere xuya dike ku zêdetirî jî sedî şêstê parvekirinên hesabê 'Al-Raqqa tuzbeh bîsemit' gotara nefretê li dijî Kurdan dihewînin. Nêzîkî jî sedî notê parvekirinên wê yê ku gotara nefretê dihewînin, nivîs in. Ji sedî dehê mayî jî materyalên dîtbarî yanî parvekirina wêne û vîdyoyan pêk tê. Di nava van parvekirinên devkî û dîtbarî de cûreyên cuda yê gotara nefretê li dijî Kurdan tîn bikaranîn û di nava van de provokasyon, stereotîpîkirin, tinazêxwepêkirin, weke xayîn binavkirin hene.

Peyvên sereke yê ku ji bo vî gotara nefretê herî zêde dubare tîn bikaranîn jî ev in: Milîsên QSD, pûcî (Apocî), terorîst, zordest, em tîn, Reqqaya dagîrkirî, tirsandin, hêzên leşkerî yê zêde.

Gava em berê xwe didinê ka ev parvekirinên ku gotara nefretê dihewînin, bandoreke çiqasî zêde dikin di warê asta hevkarîgeriyê de, em dibînin ku rêjeya navînî ya ecibandinan (like) di van parvekirinên gotara nefretê de nêzîkî sê hezar ecibandinan e. Rêjeya navînî ya şîroveyan jî nêzîkî 250 şîroveyan e. Rêjeya navînî ya parvekirinan (share) jî digihîje nêzîkî 25 parvekirinan.

Encama lêkolînê

Hebûna gotara nefretê di hesabê 'Al-Raqqa tuzbeh bîsemit' de zela e û ev gotara nefretê bi awayekî sistematîk Kurdên Sûriyê dike armanc di nav nîqaş û danûstandinan de. Di diyardeyên gotara nefretê de cihêrengî hebû, yanî ew ne tenê bi heqaretên eşkere sîncor bûn. Li şûna wê, bikaranîna peyvên stereotîpîkirinê yê ku Kurdan wek aliyekî xayîn yan cudaxwaz nîşan didin gelek in. Encaman destnîşan kir ku sorkerên sereke yê gotara nefretê bi gelemperî alî û paşxaneyên siyasî û leşkerî yê tîkildarî arîşeya heyî bûn, û ne cûdahiyên çandî yan civakî. Ev yek, gotara nefretê vediguherîne amûreke ji bo şer û pevçûnê, lê ne îfadekirina cudahiyeke civakî.

Lêkolînê nîşan da ku platformên medyaya dijital, tevî giringiya xwe di gihandina dengê qurbanîyên şer de, dikarin veguherin jîngeheke welê ya ku rê xweş bike li ber belavbûna gotarên nefretê û provokasyonê li dijî hindikahî û pêkhatiyên cuda, nexasim di çarçoveya qeyran û şeran de.

Nebûna hişyariya dijital xetera gotara nefretê û bandora wê zêde dike. Bi ser de jî qanûnên neteweyî yê ku gotara nefretê û provokasyonên mezhebî yan qewmî li ser internetê weke sûc bibîne tine ne.

Bi her halî vî nimûneyê nîlan da ku pêdivî bi lêkolînên kûr ên ku çavkanî û qada belavbûna vî gotarê dişopînin û analîz dikin heye da ku bandora wê li ser proseya biryardanê yan jî meylên raya giştî li derveyî medyaya dijital jî bipivîn.

* Xwendekara bernameya masterê ya Sosyolojîya Perwerdehiyê ya Zanîngeha Kobanê

Mamoste çawa motîvasyonê beşdarbûnê zêde bikin

Ezmûneke li Zanîngeha Kobanê

■ Rola mamoste di afirandina derfetan, misogerkirina û dabînkirina piştgiriye, û çalakkirina xwendekaran de di warê avakirina motîvasyonê û xurtkirina bawerîbixweanîna xwendekaran de pirr girîng e. Sê gavên derfetçêkirin, teşwîqkirin û misogerkirina pratîkê jî vediguherin çêkirina meydana ji bo pratîka azadiyê.

Firyaz BERKEL*

Çalakiyên zanîngehê ji bo avakirina baweriyê û bipêşxistina jêhatîbûnên xwendekaran xwedî cihê girîng in. ez dixwazim bi tecrûbeyeke xwe ya li Zanîngeha Kobanê behsa vê mijarê bikim. Di dema amadekirina çalakiya 25'ê Mijdarê Roja Têkoşîna li dijî Şideta bermaberî Jinan a Cihanê, heft xwendekarên jin yê beşa wê û zîmanê Kurdî daxwaz kirin ku beşdarî çalakiyê bibin û semînerê bidin. Weke Seroka Beşê Jineolojiyê û koordinatorka çalakiyê, min ev daxwaz erê kir da ku derfetê bidim xwendekaran dengê xwe bidin bihîstî û motîvasyonê xwe ji bo beşdarbûna siberojê zêde bikin.

Berîya niha hin lêkolîn bi meseleyê daketine, yek ji wan a Bell Hooks e, ew dibêje, gava mirov cih dide xwendekaran da ku xwe îfade bikin, ev ji bo xwendekaran dibe kirineke azadker û serdestiya kevneşopî a di nav polê de sînoard dike, pê re jî dike ku bawerîya xwendekaran bi wan zêde bibe (1994, r. 27). Ez yeqîn dikim ku bi vê tecrûbeyê ez behsa wê dikim jî di sê gavan de min karî û pratîka azadiyê tesbît bikim. Paulo Freire jî bawer dike ku beşdarbûna di çalakiyan de dibe alîkar ku xwendekar hişmendîya xwe bi pêş bixin. (1970, r. 45).

Derfetê bide û piştgir be

Min hewl da hestên xwendekaran analîz bikim, di wan bigihîjim û guhertinên di motîvasyonê wan de heger derkevin holê, şirove bikim. Ji bo vê min çavdêriya van heft xwendekaran kir û paşê jî ez bi wan re peyivim. Ev peyivîna min a bi wan re mirov dikare weke hevpeyvîneke ne fermî ya serbest binirxîne. Di destpêka pêşkêşkirina gotara wan a semînerê de tirs û fikarên xwendekaran diyar bûn, lê performansa wan bi teşwîqkirin û bersivên ku motîvasyonê wan zêde bikin yê ji temaşevanan, hêdî hêdî baştir bû. Di hevpeyvînan de yê bi heft xwendekaran re jî piştirast bû ku derfeta beşdarbûnê, sedema sereke ya amadebûna wan a ji bo vê yekê bûye.

Sê gav weke pratîkeke azadiyê

Daneyên bi dest min ketin, nişan didin ku motîvasyonê xwendekaran di sê qonaxan de bi pêş ketiye:

1) Çêkirin derfetê: Ev keliyê girîng bû ku xwendekaran dudilî û hesta berpirsiyariya xwe ya destpêkê li pey xwe dihişt û jê dibihurîn.

2) Piştgiriya rasterast a zanîngehê (saziya perwerdehiyê): Teşwîqkirina domdar di dema pêşkêşkirinê de fikar kêm kirin û bawerîya xwendekaran a bi



wan zêde kir.

3) Ezmûna pratîkî: Piştî bûyerê, bawerîya xwendekaran bi wan zêde bû û xwesteka beşdarbûnê çalakiyên li zanîngehê ji bo siberojê jî eşkere bû.

Em dibînin ku ev her sê gav bi maneya pratîka azadiyê ya Hooks de dikarin werin şirovekirin û teşwîqkirin. Ev hersê gavên weke derfetçêkirin, teşwîqkirin û misogerkirina pratîkê jî vediguherin avakirina meydana ji bo vê pratîka azadiyê. Bi giştî vê ezmûnê nişan da ku rola mamoste di afirandina derfetan, misogerkirina û dabînkirina piştgiriye, û çalakkirina xwendekaran de di avakirina motîvasyonê û xurtkirina bawerîbixweanîna xwendekaran de pirr girîng bûye. Tesîrkirina destpêkê veguherî

ezmûneke serketî û vê yekê alîkarî kir ku dengê xwendekaran zêde bibe û hebûna wan a akademîk xurt bibe.

Çavkanî

Freire, P. (1970). *Pedagojîya bindestan (ji wergera Erebi ya bi wergera Fahd Hussein)*. Beyrût: Dar wa Maktabat al-Hilal.

Hooks, B. (1994). *Teaching to transgress: Education as the practice of freedom*. London û New York: Routledge.

* Xwendekara bernameya masterê ya Sosyolojiya Perwerdehiyê ya Zanîngeha Kobanê



Tundiya devkî li dibistanan û rola mamoste



Nadiya HISÊN*

Tundiya devkî li dibistanan, diyardeyeke pirr giştî ye û bandoreke mezin li ser jîngeha perwerdehiyê dike. Ew bikaranîna zimanekî ne guncaw û zirardar e. Ew zirarê dide psikolojiya kesên din. Ew bi şiklê heqaret, tinazêxwepêkirin, piçûkxistina yên din tê. Mamoste di rêberiya reftarên xwendekaran û şekildana çandeke polê ya li ser bingehe rêzgirtinê de bi roleke giring radike. Armanca vê kurtelêkolînê ew e ku sedem û rêbazên pêşgirtina li belavbûna diyardeya tundûtûjîya devkî li dibistanan rave bike û rola mamosteyan di rawastandina vê diyardeyê şirove bike.

Em ê hewl bidin nas bikin ka têgeha tundiya devkî çi ye, şiklên wê, sedem û bandora wê ya derûnî li ser xwendekaran û rola mamosteyan di rawastandina wê de çi ye. Em ê nexasim bi têgeha bullying (belaxwetêdan) dakevin Barbara Coloroso (2008), bi "The Bully, The Bullied, and the Bystander" li ser stratejiyên pratîkî yên mamosteyan ji bo rawestandina diyardeya tundiya devkî li dibistanan disekine. Dan Olweus (1993) jî bi "Bullying at School: What We Know and What We Can Do" li ser rola mamosteyan di avakirina jîngeheke perwerdehî ya ewle û baş disekine.

Şideta devkî bêhtir bandorê dike

Em têgeha tundiya devkî li dibistanan weke bikaranîna peyvên ne guncaw û jandar ji bo zirara derûnî bi-gihîne kesên din bi giştî pênasê dikin. Rigby (2010) wê wekî bikaranîna peyv yan hevokan bi awayekî ku armanca dike zirara hestyarî yan civakî bide kesekî din, pênasê dike. Ew her wiha rave dike ku tundiya devkî ji ya laşî girantir e û bandora wê ya derûnî demdirêjtir e.

Li gorî Bandura (1977) cezaxirîn ji bo pêşgirtina tundiya devkî bi kêr nayê. Ew îşaret pê dike ku zarok reftarên xwe yên şidetê, tundûtûjîyê bi rêya teqlîdkirin û weke modelgirtina reftarên derdora xwe hîn dibin. Li gorî wê jî mamoste di polê de mîna nakeke erênî be ji bo xwendekaran, xwendekar dê wi teqlîd bikin û reftarên wan dê ji tundiya devkî dûr bin û ji hev re rêzdar bin.

Ew tekez dike ku kontrolkirina reftarên di nav polê de divê li ser bingehe rêzgirtina ji hev re ya dualî, hevkarîyê û întegrasyona komê be, ne li ser rêbazên desthilatê be. Ji vê perspektîfê, mamoste mîna rêberekî perwerdehiyê ye ku jîngeheke polê ya hevkar û ewle diafirîne û tê de diyalog û rêzgirtinê teşwîq dike (Nelsen, 2006).

Ev teorî jî bo lêkolînê kêrhatî ne ji ber ku em dikarin bi çavdêrikirin û modelkirina tevgera mamosteyan, reftara xwendekaran hem erênî û hem jî nerênî fêhm bikin da ku pêşî li vê diyardeyê bigirin û tîkiliyên bi-sihet ava bikin.

Em ji çi re şideta devkî dibêjin

Gava hinek tinazê xwe bi hinan bikin, heqaret bikin, gefan bixwin, kesayeta hinan piçûk bixin, ev bi giştî dibe şideta devkî. Espelage & Swearer (2010) dibêjin, tundiya devkî dikare paşê bibe tundiyeke laşî, nemaze di nebûna çavdêriya malbatê û perwerdehiyê de.

Gelek sedemên vê tundûtûjîyê hene. Di nava sede-

Nebûna stratejiyên perwerdehiyê yên bi bandor, pirsgirêkê girantir dike; nebûna şopandinê û rêveberiya polê ya qels jî bandora xwe dike. Ji ber wê pêdivî bi bernamêyên perwerdehiyê yên baş heye ku balê bikişînin ser bipêşxistina jêhatûbûnên ragihandinê, rêzgirtina ji yên din re û perwerdekirina mamosteyan ji bo miamelekirina bi reftarên êrişkar re.

mên ferdî de ew yek heye ku zarokên xwedî kesayeti-yên zêf, ji bo xwe îsbat bikin û zêfîbûna xwe veşêrin, meyla wan heye ku peyvên êrişkar bi kar binin (Smith, 2016). Ji bo sedemên malbatî, Bandura (1977) dibêje, "Zarok bi temaşekirin û teqlîdkirina modelên li dora xwe, hînî reftara êrişkar dibe." (r. 22). Ji bo sedemên jî ber dibistanê, Espelage & Swearer (2010) dibêjin, tinebûna qanûnên zelal ji bo kontrolkirina tevgerên xwendekaran li dibistanan, belavbûna vê diyardeyê teşwîq dike. Mirov dikare bikaranîna şidetê ya belav di nava medyayên dijîtal de ji weke sedem li van zêde bike, ji ber ku tinazêxwepêkirin û heqaretlikesankirin di van medyayan de veguheriye weke beşeke normal a danûstandinê.

Lêkolîn nîşan dide ku xwendekarên ku rastî tundiya devkî tîrî dîtîsin, ji tîkiliyên civakî vekîşiyane, naxwazin fêr bibin, baweriya wan bi wan tine ye, û beşdarîya xwe di çalakiyên polê de ji kêr dikin.

Mamoste dikare çi bike?

Mamosteyên dibistanê dikarin bi modelkirina erênî, ji bo xwendekarên xwe bibin modeleke erênî. Mamoste bi diyarkirina qaîdeyên zelal ên di nava sinîfa xwe de dikarin pêşî li helwestê û reftarên êrişkar bigirin. Gava mamoste hişyar bin, bi destwerdana zû pêşî li dewamibûn û giranbûna şideta devkî û bullyingê bigirin, ji ber ku derengketin di hêla ku pirsgirêk mezin bibe û paşê neyê kontrolkirin. Li aliyê din mamoste her wiha bi çalakiyên hinkerîyê yên ku zîrekiya hestyarî ya xwendekaran zêde bike, hêrsa wan kêr bike û gihiştina wan a di hestan xurt bike, xwendekarên xwe di vî warî de bi disîplîn bike (Rigby, 2013).

Di polan de şideta heye

Min bi metodolojiyê şiroveker û rêbaza çavdêri û analîza navrokê berê xwe da pratîka li Kobanê. Teoriya fêrbûna civakî ya Albert Bandura û teoriya disîplîna erênî ya Jane Nelsen (2006) jî bi kêra min hatin.

Çavdêriyên di polan de diyar dike ku diyardeya şideta devkî tim dubare dibe û bandoreke derûnî a nerênî çêdike. Min çavdêriyên xwe li polên sala niha a li dibistanên Kobanê sala 2025'an kirin. Min hewl da ku mijara tundî, şikl, sedem û bandora derûnî û reftara mamoste wek nimûnekirin û rola wê/wî bibînim.

Daneyan li gorî çavdêriyê nîşan da ku tinazêxwepêkirin, heqaret, peyvên nerênî û bilindkirina dengê xwe, reftarên êrişkar di nav xwendekaran de belav in. Ev tundûtûjî pirr caran ji teqlîdkirina reftarên yên din, reaksiyonên mamoste, yan jî zextên derûnî û civakî derdikeve hole.

Destwerdana perwerdehiyê ya erênî dibe alîkar ku xwendekaran ber bi reftarên erênî ve biçin, diyalogê

bi pêş ve bibin û pirsgirêkên di nava polê de çareser bikin. Reftarên mamoste wekî nimûneyeke erênî ya ji bo xwendekaran tundiye kêr dikin, lê nebûna çavdêriyê yan bersivên nerênî dikarin şidetê girantir bikin. Yanî pêwîst e ku tîkiliyê erênî di navbera xwendekar û mamoste de hebe.

Li şûna encamê

Çavdêri û analîzê eşkere kir ku tundiya devkî ya di nav xwendekaran de pirr caran ji hêla kesên li dora wan ve tê teqlîdkirin. Xwendekar dema ku nikarin hes-tên xwe derbibirin, heqaretê dikin yan jî didin qîran. Dibistan hîn jî ji bo bipêşxistina jêhatûbûnên ragihandinê yên xwendekaran hewceyê bernamêyan in.

Hin mamoste pirr dereng mudaxele dikin, ev yek jî nîşan dide ku tedbirên pêşilêgirtinê nînin, û hin mamoste zimanekî tund bikar tînin, ku mîna nîşanê nerênî nîşan didin. Tundiya devkî li dibistanan belav e, ev yek nîşan dide ku nebûna hawîrdoreke dibistanê ya pişt-gir tevgerên êrişkar pêş dixê.

Ji ber wê di encamê de em dikarin bibêjin, tundiya devkî di dibistanan de diyardeyeke giştî ye, ew bi destketî ye û ne xwemalî ye. Faktorên civakî û zextên derûnî van reftarên zêde dikin. Nebûna stratejiyên perwerdehiyê yên bi bandor, pirsgirêkê girantir dike; nebûna şopandinê û rêveberiya polê ya qels jî bandora xwe dike. Ji ber wê pêdivî bi bernamêyên perwerdehiyê yên baş heye ku balê bikişînin ser bipêşxistina jêhatûbûnên ragihandinê, rêzgirtina ji yên din re û perwerdekirina mamosteyan ji bo miamelekirina bi reftarên êrişkar re.

Çavkanî

Bandura, A. (1977). *Social learning theory*. Englewood Cliffs, NJ: Prentice-Hall.

Coloroso, B. (2008). *The bully, the bullied, and the bystander: From preschool to high school — How parents and teachers can help break the cycle of violence* (Updated Collins Living ed.). Collins Living.

Espelage, D.L., & Swearer, S.M. (2010). *Bullying in North American schools: A social-ecological perspective on prevention and intervention* (2nd ed.). New York, NY: Routledge.

Nelsen, J. (2006). *Positive discipline*. New York, NY: Ballantine Books.

Olweus, D. (1993). *Bullying at school: What we know and what we can do*. Malden, MA: Blackwell Publishing.

Rigby, K. (2013). *Bullying in schools: Addressing desires, not only behaviours*. Cambridge: Cambridge University Press.

Smith, P.K. (2016). *Understanding school bullying: Its nature and prevention strategies*. Routledge.

* Xwendekara bernamêya masterê ya Sosyolojiya Perwerdehiyê ya Zanîngeha Kobanê

Sînorê di navbera Kurd û Ereban de

Ehmedê Şeng mezinê Dodikiyan û şerê li dijî Gêsan

*Bihar e, xweş bihar e,
Eskeran bikin kar e,
Ehmedê Şeng mala xwe bar kir, deyna li bin Çiyayê Evdilezîzê, li pêş miqabilî neyaran...**

Ev destpêka destanekê, hema welê jixweber nîne. Em behsa destanekê dikin ku li gorî destanên din kêmtir nasîn: Destana Ehmedê Şeng. Ehmedê Şeng mezinê eşîra Dodikiyan, "li bin Çiyayê Evdilezîzê, li pêş miqabilî neyaran" mala xwe datîne. Em li vir esas li eqarên diskurseke li ser sînoran in, eynî weke di destana Dewrêşê/Derwêşê Evdî de. Ji ber wê, êdî veguherîbe adetekê ji wê ne şaş be mirov behsa xwe bibe ser meseleya sînor û nasnameyê ya li cem Barth. Barth (1969: 9-37) û fikra komên etnîk û meseleya sînor, wê gelekî alîkar be bi me re ku em analîzeke pak û bikêrhatî bikin li ser destana Ehmedê Şeng. Em dikarin her wiha ji fikra Barth a li ser tesewerura sînorên komê (2000: 22-23) jî sûde wergerin.

Em ji maneya peyvê dest pê bikin; sînor eqarên li ser zemîn ji hev cihê dikin, ew xetên ku komên civakî ji hev cuda dikin, datînin, û ew mestereyekê datîne ber me ji bo wê tiştê ku kategoriyên hizrî ji hev cihê dike (Barth 2000: 17). Lê belê di hizra Barth de ev sînor û maneya wê ji bo gelek civakan ne lê ye. Jixwe ji bo civakên koçer (nimûneya wî ya li ser Basseriyanê Îranê) bi ya wî nîzam xwe nasîpêre sînoran (2000: 19). Ev van nimûneyan dide ji bo nîşan bide ku ev taybetmendî û pirrengî wînda dibin, gava mirov têgeheke sînor a yekreng pêşniyaz bike. Ew dixwaze pirrenigiya çandî li ber çavan were girtin: Çi dike ku mirov sînor deynin, bikişînin? Ev pirs bi ya wî diyarker e. Lê erê kengî sînor tînin danîn?

Bersiva ewilî wê bibe sînor tiştên ji hev cuda, cihê dikin. Yanî hizreke ku gava em berê xwe bidinê weke keviyên tasekê be. Nimûneyên wê herî zêde em di pratîka dewletan de dibînin, lê ew jî gelo çi qasî zelal û diyar in, hê jî ne darîçav e. Barth bi alîkariya helbesteke şairê Lehistanî, Wisława Szymborska jî îşaretê pê dike ku sînor ji mirovan nasname û pasaportan dipirse lê ma jî tiştê ne mirov:

Ho sînorên qulo-pilo yê wan dewletên bi destê mirovan çêkirî!

Çendîn ewrên li ezmanan bêceza ji we bihurîn,
Çi qas ji wê qûma çolê ji welatekî ber bi welatê din ve diherike;

Çendîn ji wan zixurên çiyayan digindirin ser erdên welatê xerîb

bi wan hilpekinên provokatîf!

...

Bi tenê ya ku insan e dikare xerîb be.

Ya mayî dixwest û giyayên tevlihev, xiltên rûxîner û ba ye.**

Li vir, bi nimûneya vê helbestê Barth esas balê dibe ser wê yekê ku sînor tiştêkî bi temamî elaqedarî mirovan e û weke têgehê avakirin. Em bi xêra vê, dikarin li fikra wî ya 1969'an jî vegehin. Beriya Barth, qewm



Sîwarê Kurd ji kitêba 'Illustrated Travels' ya H.W. Bates a sala 1875'an li Londonê hatî weşandin.

(komên etnîk) weke komên nisbî biistiqrar ên ku xwedî hin xisletên -ziman, çand, dîn, rêûresm- hevpar dihatin dîtin, lê wî ev paradîgma guherand. Li gorî wî, qewm ne ji ber xisletên çandî yê hevpar hene lê ji ber sînorên di navbera 'me' û 'wan' de qewm hene. Lê belê, li vir sînor ne sînorên fizîkî yan jî cewherên çandî ne, ew cihêrengiyên ku civakî hatine afirandin bi xwe ne. Yanî ew cudatî yan jî cihêrengî, bi destê civakên insanan tînin çêkirin.

Di encamê de jî ew dibêje, xisletên civakî dikarin bi guherin, lê ew wî qewmî jî hev naxe. Tiştê muhim li vir ew e ka kî weke endamê komê tê qebûl kirin hem jî aliyê endamên din ên komê ve û hem jî jî aliyê wanên li derveyî komê ve. Maneya vê jî ew e ku sînor ne bi tecrîd û jehvqutkirinê li ser xwe dimînin, lê bi danûstandinê. Gava em vê wiha bibînin, em dikarin bibêjin, nakokiyên elaqedarî meseleyê jî hene ku Barth bal bi riya ser wan. Têkiliya di navbera yê derve û yê hundir de qewmîtiyê (nasnameya etnîk) jî holê ranake, berevajî wê, wê xurt dike. Nakokiya din jî ew e ku qewmîtiyê herî zêde li sînoran xuya ye, ne li navokê (1969: 14-15).

Li vir em dikarin berê xwe bidin wan çerxên ku sînoran li ser xwe digirin. Li gorî Barth, di nava van de qaîdeyên ji bo endametiya koma etnîk, guhertina nasnameyê ya li gorî rewşê, sinifandina bi çavên yê din û helwêsta stratejîk -xelk qewmîtiyê li gorî peywendê derdixê pêş yan jî nemuhim dike- hene (ibid.: 15-16). Ji ber wê jî di biwara avakirina qewmîtiyê de ev yek dihele ku em ji bo qewm bibêjin, ew bi peywendiyên çêdibe, ne statîk e lê bi pêvajoyê çêdibe, ne tenê çandî ye ew her wiha siyasî û aborî ye jî; her çî sînor e, ew jî mekanê vê danûstandinê û pêvajoyên çandî, siyasî û aborî ye.

Di gotara xwe ya sala 2000'î de Barth esas rexneyêkê digire li wan modelên ku ji bo têgeha sînor maneya jehvqutkirinê derdixînin pêş. Ew bi vê rexneyê, sînoran weke mekanên tîkiliyan derdixê pêş: bazirganî tê kirin, fikr di nava koman de diçin û tînin, nasname tînin wergerandin û desthilatê mizakerekirin. Ev jî dibe bîngehekî xurt ê teorîk ji bo hizrên wî yê sala 1969'an.

■ Di destana Ehmedê Şeng de çiya ew mekan in ku Kurdan lê şax berdane û lê xweser in, çol jî weke mekan erd û eqarên eşîrên Ereban in. Ji ber wê, em dikarin bibêjin, Çiyayê Evdilezîzê sînorekî sîmbolîk û pratîk e

Sînor li Kurdîstana sedesala 18'an de

Ev têgehkirina sînor a li jor, ez ê li ber çavan bigirim ji bo analîza xwe ya li ser destana Ehmedê Şeng, wî mezin û maqûlê eşîra Kurd a Dodikiyan. Di destanê de mekanê sereke Çiyayê Evdilezîzê ye yan jî çawa hin çaran jî ber darên kizwanan yê lê, jê re her wiha Çiyayê Kizwanan jî vê dawiyê hatiye gotin. Ev çiyayê hanê bi tevahiya maneyên xwe li gorî têgehkirina Barth, sînorek e di navbera eşîrên Kurdan û eşîrên Ereban de. Ji ber wê em xweşikê tê digihin ka maneya "li pêş miqabilî neyaran" çi ye: sînorê bi wanên ne ji me re, lê ew sînor bi rastî jî ne sînorekî jehvqutkirinê ye. Em di naveroka destanê de bi rehetî pê dihisin çawa danûstandineke eşkere heye di navbera Dodikî û Gêsan de û bi maneyê berferhtir de jî di navbera Kurd û Ereban de. Mekanê vî sînorî bi temamî li Rojavayê Kurdistanê yê îro li nava erdên Heseke ye.

Bûyera di destanê de sala 1870'yî ji mêj bûye destanek û weke destanê gotin jî. Wekî din jî ber ku îro pîrr kêmtir varyantên wê hene, em dikarin bi hêsanî bibêjin ku ew ne ji wan destanên dengbêjiyê ye ku li ser bûyerên sedesalên 19 û 20'an hatine gotin. Di vê destanê de hiç behsa tivingan jî nayê kirin û sîlehên navê wan tînin hildan serê pêşî rim in. Ji ber vê jî em dikarin qebûl bikin ku ihtîmal mezin e, bûyer beriya dawîya sedesala 18'an qewimîbe. Ev qewmîna hanê, ji bo dîroka Kurdan giring e ku mirov tê bigihîje ji ber sedemên cuda: Destan behsa hebûna Kurdan li Sûriyeyê îro dike û behsa sînorên çandî, cografî dike yê di navbera eşîrên Kurd û Ereban de û ev sînor ne sînorên ji hev qutkirinê ne, lê belê sînorên tîkîlîdaninê û danûstandinê ne di gelek warên cuda yê weke, mêvanî, parastin, zêdegavî, talan, şer û tolhildanê de. Di vî warî de esas em behsa destanekê dikin ku muhtemel e, beriya destana Dewrêşê/Derwêşê û Edulê şûna wê bigire, li Kurdistanê belav bû û naratîveke diyarkirina nasname, cografî û peywendiyên di navbera qewman de bû. Bi vê awirê em hewl bidin analîza xwe bi pêş bixin.

■ Di destanê de Dodikiyên Kurd xwedanê rewa û heq ên bikaranîna Çiyayê Evdilezîzê û zozanên wî ne. Gêsanên Erebb jî weke talanker ketine nava erdekî ku ew li serê mêvan yan neyar yan jî dijmin in. Yanî ev destan weke naratîv serweriya Dodikiyan li ser vî mekanê sînor rewa dike.

Sînor weke cografya

Ev destana hanê mekanê eşîra Kurdan a Dodikiyan pircarî diyar dike û navên sînorên wê weke mekanên li ser zemîne hildide. Ev mekanên li ser zemîne jî de facto bi rola sînor bi maneya li cem Barth radibin. Ev mekanên li ser zemîne ên cografî, serê pêşî Çiyayê Evdilezîzê û zozanên wî ne. Li vir ya ku vî çiyayî û zozanan dike şûna sînoran bi maneya Barth behsa wan dike, bicihbûna Dodikiyan tevî pezê xwe ye. Helbet vegirtina konên Ehmedê Şeng jî weke sembola vê ev dibihîsin. Em bi awayekî zelal û hevîrtî dibînin ku ev mekan weke mekanê eşîreke Kurdan, weke zozanên rewa yê vî eşîrê hatine pênasakirin û parastina wan jî li gorî adetê û anorê/rûmetê ye. Destan eşkere nîşan dide ku Dodikiyên Kurd xelkê çiyê ne û ew wî çiyayî fetih nakin, ew çiyayên wan e ku her bihar tîne.

Gava em berê xwe didin pênasakirina erdên Gêsan, ew jî pîr eşkere hatina pênasakirin: Ew jî binya Bexdayê ne, ji wan germiyan û çolistanan in ku li başûr û başûrrojhatê Çiyayê Evdilezîzê ne.

Em li vir kontrasteke eşkere di naratîva vê destanê de dibînin. Çiya ew mekan in ku Kurdan lê şax berdane û lê xweser in, çol jî weke mekan erd û eqarên eşîrên Erebb in. Ji ber wê, em dikarin bibêjin, Çiyayê Evdilezîzê sînorekî sîmbolîk û pratîk e jî. Ew bi maneya xwe ya mekanê danûstandin, lihevrahatin û têkiliyê jî sînor e, çawa ku di mêvandariya Dodikiyan a ji bo siwarên Gêsan de jî diyar e. Yanî, ev sînor heta ku dijminatî, dizî û talan nekeve nava meselê, mekanên lihevrahatin û danûstandinê ne. Lê gava dijminatî, dizî û talan dikeve nava meselê jî vediguherin sînorên divê li halê xwe yê berê werin vegeandin: Talan bê vegeandin, mekanê pêrgîhevhatinê jî nû ve were avakirin, çimkî talanê ev sînor bînpê kirine û heta bêkeramet kirine.

Sînor weke hiqûqeke di navbera eşîran de

Em li vir berê xwe bidin têgeha sînor weke hiqûqekî exlaqî di navbera eşîran de, nexasim di navbera eşîrên Kurd û Erebb de. Ev sînorê ku di destanê de li ser eşîra Kurd a Dodikiyan û ya Erebb a Gêsan li serê rasta hev tîne, îro li rojhilatê bajarê Heskê ye. Lê ev sînor cografî weke mekanekî diyar jî be, di destanê de em dibînin ku sînor esas weke xeteke heyatî ya exlaqî ye û ne sînorekî madî ye.

Sînor pêşî mêvandarî ye. Yanî ne jihevqutkirina eşîran (ên Kurd û Erebb) e, lê mekanê li gorî qaîdeyên eşîrî, adet û exlaqê civakî pêrgîhevhatin û têkiliyan e. Erê rast e ku mezinê Gêsan biryara rakirina terş û talanê Dodikiyan didin û wan çav berdaya Leylika Qemer yanî mehîna Ehmedê Şeng jî, lê ew li gorî adetên, bi mêvandariya Dodikiyên Kurd tîne hewandin. Çaxê ku 150 siwarên Gêsan ên Erebb dikeve erd û eqarên Dodikiyan, ew li bin konê mezinê eşîrê Ehmedê Şeng dihêwirin. Tevî ku Ehmedê Şeng ne li mal e jî, Xatûnê, hevîna wî xizmeta wan dike: Ew hespên wan ditewilîne, doşek û balgeh



Kurd siwarê hespê tevî zirîpoşên xwe. Di koleksiyona wêneyên litografîk a Alexandre Orlovski ya sala 1819'an.

li binê kon jî bo wan datîne, taştê, firavîn û şîva wan çêdike, qehwê li wan digêrine. Yanî tam heft rojan mêvandariya li gorî adetên eşîrî li wan dike. Jixwe li gorî qaîdeyên adetên eşîrî yê Kurdan, mêvan parastî ne, ew mêvan dijmin jî be gava li binê kon xwe avêt bextê xwediyê kon, ew jî parastî ye.

Bi vî maneya xwe, hatina binê konê Ehmedê Şeng a 150 siwarên Gêsan, ne bînpêkirina sînoran e. Ew hîna danûstandina li ser mekanê sînor pêk tîne.

Bînpêkirina sînor

Gava ku piştî heft rojan, di mêvandariya xwe de hevîna Ehmedê Şeng, Xatûn qisûrê nake, lê mêvanên wê yê Gêsi, beriya biçin li terş û talanê Ehmedê Şeng û Dodikiyan dixin, ha hingê ew wî sînorî bînpê dikin. Yanî sînor ne xeteke madî ye ya ku hinek bînpê dikin, lê mekanek e û bînpêkirina wî jî esas şikandina adet, keramet, rûmet û anora eşîrî ya aliyekî ye. Siwarê Gêsan ên Erebb jî bi rakirina terş û talanê Ehmedê Şeng û Dodikiyan, vî yekê dikin. Ev kirina wan, yekser statuya wan a mêvanbûnê betal dike û wan dixê statuya 'dijmin'. Li vir dijmin di nava neynokan de ye, ji ber ku diyar e di bikaranîna li nava adetên eşîrî de neyar xwedî maneyeke dualî ye: Hem biyanî û hem jî dibe ku dijmin be. Lê dijmin êdî ew biyanî ye ku dijberiya wî îsbat bûye.

Tiştê ku Gêsan beramberî Dodikiyên Kurd dike dijmin, xwedî du xisletên sereke ye. Yek jê, Gêsan bi rakirina terş û talanê Dodikiyan kerameta Dodikiyan şikandiyê yanî sîncekî elaqedarî anora eşîrê li meydane ye; ya din jî wan zerareke mezin a aborî daye Dodikiyan ku qebûla wê, wê karibe rê veke li ber encamên xirab ên elaqedarî guherîne mekanê sînor jî. Bi her halî di destanê de pîr eşkere ye, gava ku xiyamet bi mêvandarî Dodikiyan re

tê kirin, sînor hatiye bînpêkirin, ne ku gava 150 siwar tîne bin konê mezinê Dodikiyan.

Mekanê sînor ji bo cudatîyên siyasî û rewakirina serweriya Dodikiyan

Gava em berê xwe didin meseleyên biryardayîne di nava her du eşîran de em cudatîyên sereke dibînin. Lê di zimanê destanê de hukim li van cudatîyan nayê birîn. Sermeselê çaxê ku Gêsan biryara rakirina terş û talanê Ehmedê Şeng didin û esas ew dixwazin Leylika Qemer yanî mehîna Ehmedê Şeng jî hilînin, eşkere ye ku Xalê Xewşabî Gêsan vî biryarê bi serê xwe dide bêyî şewrê û dike ku 150 siwarên Gêsan bi vî karî rabin.

Biryara Ehmedê Şeng a vegeandina terş û talanê xwe ya destpêkê jî şexsî ye. Lê gava eşîr bi vegea bêyî siwarê xwe ya Leylika Qemer dihise, em dibînin ku pêvajoyeke şewrê li diwana Dodikiyan dest pê dike û di encamê de çar siwarên Dodikiyan li pey Ehmedê Şeng û hilanîna tola wî diçin. Ev cudahî ne tenê li ser pêvajoyên biryardayîne ne, em bi rehetî bi xisletên Gêsan ên weke talankeriyê û xiyametê di şexsê kevne-xulamê Ehmedê Şeng, Sergêse Gêsi dihîsin. Beramberî vî yekê, xisleta Dodikiyan jî ew e ku tevî ku bi siwar û şervanên xwe xurt in, biryara tinekirina yê hember nadin. Heta ji ber ku bi xiyameta Sergêse Gêsi nizanin, wî û malbata wî li nav konên xwe diparêzin jî.

Ev behsên li jor û cudahiyên hanê, elaqedarî têgeha sînor di peywendaya qewmî û eşîrî de du tiştan nîşanî me didin. Ya yekê ew e ku Dodikî xwedanê rewa û heq ên bikaranîna wan erd û eqarên Çiyayê Evdilezîzê û zozanên wî ne û ya diduyan jî ew e ku Gêsan weke talanker ketine nava erdekî ku ew li serê mêvan, neyar yan jî dijmin in. Yanî ev destan weke naratîv serweriya Dodikiyan li ser vî mekanê sînor rewa dike.

■ Nîşana Leylika Qemer a herî mezin ew e ku ew sînor ji serketina xiyanetê re datîne. Leylika Qemer kujerê xayîn ê Ehmedê Şeng yanî Sergêsê Gêsî piştî ku benê xwe diqetîne, ji binê kon dikişîne û di kuje. Leylika Qemer weke dewameke zindî ya erdên Dodikiyan e, ew bîreke rewa û heq a xwedîtiya wî erdî nîşan dide.



Suwarên Kurd di dema şerê Rûs-Osmanî di salên 1877-1878 de.

Şemûga li ber şidetê

Sînor di vê destanê de bi vegotîneke epîk weke şemûgêkê jî hatiye sêwirandin, gava mirov ji wê şemûgê dibihure êdî meydan dibe meydana şerî û ya şidetê. Ev metna epîk di wî warî de ka şidet kengî rewa ye, pirr zelal e. Pêşî behsa cihên eşîr lê ne û jê tèn dike: Gêsan ji binya Bexdayê ji çolistanê tèn, Dodikiyan hatine zozanên xwe yên li Çiyayê Evdilezîzê.

Piştê em dibînin ku behsa rêxistina Gêsan tê kirin ka mezinên wan çawa bê şêwr biryaran didin. Di warê Dodikiyan de jî Ehmedê Şeng weke mezinê eşîrê hatiye sêwirandin. Hatina Gêsan li bin konê Ehmedê Şeng, ne sedema şidetê ye, lê sedema nîşandana mêvandarîyê ye. Dodikiyan, esas hevîna Ehmedê Şeng 7 rojan mêvandarîya wan bêqisûr dike. Diyar e ku di mohleta vê mêvandarîyê de mêvan parastî ne. Lê dizî û talana piştî ku ji wir diçin, eşkere binpêkirina wî sînorî ye ku heta hingê rê li ber bikaranîna şidetê digirt. Ji ber wê jî gava Xatûn bi xemgînî û ji neçarî behsa meseleyê dike, Ehmedê Şeng dide dîv talankerên Gêsan û êdî em dibînin ku arîşe yan wê bi teslîmbûna Gêsan yan jî bi şer bi encam bibe. Gêsan ji talan biqerîn jî hazir nînin bi xwe wî terş û talanî vegehrînin. Ev yek dibe sedem ku Ehmedê Şeng yê ku bextê Leylika Qemer daye siwarên Gêsan, şerê wan bike. Em behsa şerekî dikin ku tê de Ehmedê Şeng bi taktîka şer a serketî, 150 siwaran bi hev ve dişidîne û her carê bi dehan ji wan di kuje, heta ku qedere sedî ji wan di kuje. Piştî hingê yên sax mayî doza bext dikin û Ehmedê Şeng jî wî bextî dide wan.

Heta bi vê deverê, tişta ku Ehmedê Şeng di warê sînor de dike, ew e ku sînorê heyî yê di navbera eşîran de jî nû ve ava bike. Ji ber ku ew rakirina terş û talanê eşîra xwe qebûl nake yanî erd û eqarên xwe diparêze, bi kirina xwe -vegerandina terş û talan bi destê talankeran- ew hem sînorên heyî jî nû ve ava dike û hem jî hiqûqa adetên eşîrî jî ferz dike.

Arafa xiyanetê

Piştî teslîmbûnê, di avakirina sînor de em arafekê dibînin. Sergêsê Gêsî ku ji kevnexulamên Dodikiyan e, xwe nêzî Ehmedê Şeng dike, dibêje, ew bi zorê xistine nava cerda talanê û ji xafil ve û bi xayînî rimêkê li defa sînga Ehmedê Şeng dixê û wî di kuje. Ev yek di jinûveavakirina sînorê berê de dibe kêliyê zelûliyê. Mirov nizane ka wê sînor vegere halê berê yan na. Yanî gelo hem terş û talanê Dodikiyan hat rakirin û hem mezinê wan hat kuştin û encama destanê ev e? Eke kakunî û pîrs ev dimînin. Lê em li vir sînorekî din dibînin, Leylika Qemer bi xwe weke sînorekî sîmbolîk nahêle ti siwarê Gêsan xwe nêzî wê û nêzî cenazeyê Ehmedê Şeng bike. Dilsoziya Leylika Qemer bi xeyal û sêwirandîneke xurt hatiye vegotin ku di navbera talankeran û Ehmedê Şeng de

bûye diwarek, sedek, sînorek.

Gava Leylika Qemer bêyî siwarê xwe vedigere nava Dodikiyan, êdî mesele deng vedide, rûspî û peyayên Dodikiyan diwana xwe datînin û biryarê didin ka kî wê li pey Gêsan biçe. Bi awayekî balkêş, em dibînin ku di bersivê de Dodikî li jin û zarokan tèn rehmê û her wiha gava kevnexulamê xwe Sergêsê Gêsî nas dikin, wî û zarokên wî jî ji nava cerda xwe xilas dikin û li nava eşîra xwe bext didin wan. Em li vir sînorekî eşkere yê bikaranîna şidetê di nava Dodikiyan de dibînin. Yanî gava ku ew kerameta binpêkirî jî nû ve li wan vegehrîya, şidet jî bi dawî dibe. Sînorê di vê vegotîna epîk de sînorekî jî nû ve tê avakirin e, ne yekî berferêkirina eqarên xwe û fethê ye.

Leylika Qemer weke sîmboleke sînor

Me li jor hinekî behsa wê yekê kir ka piştî xiyanetê, Leylika Qemer çawa sînorek li ber talankeran danî, da ku xwe nêzî cenazeyê Ehmedê Şeng nekin. Li vir êdî Leylika Qemer ne tenê mehîneke dilsoz e, ew di heman demê de nîşaneke sînor e jî, sînor diyar dike. Ew nahêle wê bi xwe bigirin û bibin, û ew nahêle ku siwarên Gêsan xwe nêzî cenazeyê Ehmedê Şeng jî bikin. Bi vegehrîya xwe ya Çiyayê Evdilezîzê bi tena serê xwe, ew hem cerda vegehrandina talanê mumkin dike û hem jî Dodikiyan dibe ser cihê ku cenazeyê Ehmedê Şeng lê ye. Belkî nîşana Leylikê ya herî mezin di vê sînorandinê de ew e ku ew sînor ji serketina xiyanetê re datîne. Leylika Qemer ji bir nekiriye ka kî bi xiyanetê Ehmedê Şeng kuştîye û wî xayînî yanî Sergêsê Gêsî piştî ku benê xwe diqetîne, ji binê kon dikişîne û di kuje. Em dikarin bibêjin ku Leylika Qemer weke dewameke zindî ya erdên Dodikiyan e, lewma ew bîreke rewa û heq a xwedîtiya wî erdî nîşan dide. Jixwe, bi awayekî xwezayî berê wê li Çiyayê Evdilezîzê ye û ev yek jî vê hêza wê ya sîmbolîk a elaqedarî çiyê nîşan dide.

Sînorên qewmî neyekser lê zelal in

Herçî sînorên di navbera qewman de ne, neyekser jî be zelal hatine îfadekirin. Vegotîna epîk a vê destanê di şifrekirinê xwe de eşkere nîşan dide ku Dodikiyên Kurd xelkê çiyê ne û girêdayî keramet û anora xwe ne. Beramberî wê, Gêsan ê Ereb xelkê çolistanê ne û aboriyeke wan a xwe dispêre talakeriyê heye. Ji ber wê ev sînorên qewmî di heman demê de weke sînorên di navbera cudatîyên aborî, ekolojîk û exlaqî de jî xwe diyar dike. Bi her halî jixwe ji destanê em tê digihîjin binpêkirina bi qest a van sînoran rê li ber bûyerên giran vedike ku em dikarin weke felaket jî bi nav bikin: Bi sedan siwarên Gêsa tèn kuştin û mezinê Dodikiyan Ehmedê Şeng jî tê kuştin.

Li şûna encamê

Destana Ehmedê Şeng weke vegotîneke epîk behsa şerekî di navbera du eşîran de nake, ew nihêrineke li dinyayê ya diyar şifre dike. Di vê nihêrîna li dinyayê de Çiyayê Evdilezîzê welatê Kurdan û eşîra Dodikiyan e. Herçî Gêsan in, li wir tenê weke mêvan rewa ne. Gava Gêsan li talanê Dodikiyan dixin, ev dibe binpêkirina sînor her wiha di warê cografî de jî. Bersiva Ehmedê Şeng û paşê mêrxasên Dodikiyan Kose Etman, Kose Neman, Kose Şahîn û Osman esas li vir jî bo jinûveavakirina sînorê heyî ye. Hem Ehmedê Şeng û hem jî ev mêrxas xwe ji tinekirina bi temamî ya Gêsan didin alî û ev jî nîşan dide armanc li vir ne berfirehkirina sînor, lê jinûveavakirina sînorê weke mekanê danûstandina di navbera eşîran - Kurd û Ereban- de ye. Yanî tolhildaneke ji bo tinekirinê em nabînin, tolhildana ji bo Ehmedê Şeng bi xwe jî ne ji bo tinekirinê ye, ji ber ku Dodikî li zarok û jinan tèn rehmê.

Bi vî rengê xwe, em dikarin bibêjin, ev destan weke qanûneke yan jî hiqûqeke eşîrî karîger e, sînorên Dodikiyan beramberî Gêsan rewa dike bi cografîya, adet û naratîveke dadê. Ev sînorê hanê yê tê danîn, weke mekanekî hatiye sêwirandin e ku li ser danûstandin di navbera du komên eşîrî û qewmî jî hev cuda de bi rê ve biçe. Bi awirê Kurdan, ev dibe destaneke mêrxasî û kerameta eşîrî beramberî talankerîya eşîrên çolistanê yên weke Gêsan. Mirov dikare vê destanê tevî destana Dewrêş/Derwêş û Edûlê jî bixwîne û wê destanê jî di çarçoveyê dewamîbûneke dîrokî de çêtir analiz û şirove bike.

* Albert Socin, ev berhem sala 1870'yî li Xaxoyê berhev kirîye. Binihêre li (Socin 1890: 201-214). Ji bilî varyanta jor a Socin berhev kirî, ez rasta varyanteke ku Hesên Elî Xencer dibêje jî hatim. Lê belê divê nivîsê de ez ê xwe bi tevahî bisîpêrim varyanta Socin ji herêma Botan berhev kirî.

** Barth esas vê helbestê jî bo xurtkirina argumana xwe bi kar tîne, lê min temamê ferdaya destpêkê û dawîya helbestê neqand, tercîhên wî guhertine (Barth 2000: 28).

Çavkani

Barth, Fredrik (ed.). (1969). *Ethnic groups and boundaries: The social organization of culture difference*. Boston: Little Brown and Company.

(2000). *Boundaries and Connections*. di nava: Antony P. Cohen (ed.), *Signifying identities: Anthropological perspectives on boundaries and contested values*. rr. 17-36. London: Routledge.

Socin, Albert. 1890. *Kurdische Sammlungen, zweite Abteilung, Erzählungen und Lieder im Dialekte von Bohtan*. Sankt Péttersbürg: Eggers et Comp.

Helbestek ji destanekê re

Akademîsyen, nivîskar û şair Selim Temo li ser 112 hespên qehremânên dîrokî û epîk ên Kurdan şîrên bedew nivîsandin û tevî xezelekê ji ew weke kitêb sala 2023'yan weşandin*. Wî weke nêzîkbûn û dûrketina hespan ji mekanekî, yan bi yek ristê dest pê kir û ferdayên xwe gihandin pênc ristan, yan ji pênc ristan dest pê kir û ferdayên xwe li yek ristê sekinandin. Di nava hespên wî de mehîna Ehmedê Şeng, Leylika Qemer nebû. Min xwest hem ji bo qehremaniya epîk a Ehmedê Şeng û hem ji bo dilsoziya epîk a Leylika Qemer, diyalogeke min a kurt bi 112 hespên Selim Temo re hebe. Min Leylika Qemer bi dût ve meşand yanî bi pênc ristên ferdayê dest pê kir û li yekê sekinand. Leylik hem behsa mêraniya Ehmedê Şeng dike, hem behsa mêrkujî lê ne qatîlbûna xwe dike û hem ji qeda li xiyayeta Sergêşê Gêşî dibarîne.

113 Leylika Qemer

*Car ne tenê car e,
car zeman e yê dizane jixwe dizane
Ne ku ez tolhildêr im,
ne ku qatîl im, erê mêr kuştin min
Çawa tîna min wekî din bişikesta,
hedana min bihata, pîrzane?
Çawa ez girêdayî bimama li binê xêwetê,
li aliyê odê çavên min?
Sergêşê Gêşî rûne, bixwe,
vexwe li ser mehfûrên te bi paldane*

*Ez mêrkuj im,
lê ne qatîl, tu jî mêr, mêrekî çê Ehmedê
Şeng
Heft rojan nanê te xwarin,
li ser mehfûrên te rûniştin, ez bibilînim
Xatûna te xizmeta wan kir,
kêşa cefa, wan li talanê te xist bê deng
Te pîrsî çima tu gehgeriyê dikî,
ma wekî din çawa dewesê hilînim?*

*Tu li ber Gêşan sekiniyî,
te got, ez Ehmed im, Ehmedê dîn im
Te biland,
ez teng û baletengê Leylika Qemer dişidî-
nim,
Te çi şer kir! Te sed mêrên Gêşan avêtin
erdê,
ez ê car dîn nebînim!*

*Ax Sergêşê Gêşî kevne xulamo,
te çima xwe avêt bextê min
Ax Ehmedê Şeng
te çima bextê min da wî bêbextî, weyla li
min*

*Xayinî ne marê kor e, tîremar e,
min dît li depa sînga te ket û çikiya rim*

* Temo, Selim. 2023. 112 hesp û xezelek.
Weşanên Dara: Amed.

■ **“Ax Sergêşê Gêşî kevne xulamo, te çima xwe avêt bextê min
Ax Ehmedê Şeng te çima bextê min da wî bêbextî, weyla li min**



Şerê Seîd Begê Dasinan

Moltke û Bedirxan Begê êrişî Keleha Ridwan dikan

■ **Seîd Beg wek serokekî herêmî yê Êzîdîyan, bi rola siyasî, civakî û sembolî rabû. Di wê demê de di navbera dewlet û serokên herêmî de arîşeyên di asta rûxîne de hene û Seîd Beg wek nîşaneya berxwedan û parastina civaka xwe hate naskirin.**

Dilber UMER*

Bûyerên sala 1838'an li herêma mîrîtiya Dasinan û devera çemê Ridwanê, yek ji bûyerên giring ên dîroka Kurdistanê ye, ne xam ji bo civaka Êzîdî. Ev bûyer di şert û mercên siyasî û leşkerî yên sedsala 19'an de çêbûn, demke ku dewleta Osmanî bi şertên nû yên navendîkirinê û kontrola herêman, hewl da ku desthilatdariya xwe li ser mîr û serokên herêmî zêde bike (Van Bruinessen, 1992, rr. 170–175 û (Fuccaro, 1999, rr. 20–25). Bedirxan Beg, weke aktorekî herêmî yê xurt, di navbera fermana Osmanî û armançên xwe yên mîrîtiyê de cih girtibû (Layard, 1849, rr. 160–165).

Di nav van şertan de, Seîd Beg, weke mîrê Dasinan, yek ji kesayetên sereke yên civaka Êzîdî, di nav çavkaniyên dîrokî de wek mîr, serok û sembolekî berxwedanê hatiye nîşandan (Rich, 1836, rr. 90–95).

Devera Ridwanê ne tenê cihê şer û têkoşînê bû, lê her weha ew cihêkî welê bû yê ku tê de guhertinên dîrokî bi awayekî zelal xuya dikirin. Em dinava çavkaniyên dîrokî de nameyên şewirmendê eskerî yê Prûsyayî di nava artêşa Osmanî de jî tî (Von Moltke, 1845, rr. 45–48).

Bûyerên sala 1838'an li devera Dasinan û çemê Ridwanê, çawa di navbera siyaseta dewleta Osmanî, rola Bedirxan Begê û serokatiya herêmî ya Seîd Begê de pêk hatin û çawa di çavkaniyên dîrokî de hatine nîşandan, em ê niha berê xwe bidinê. Ji bo wê jî ev pirsên hanê wê alîkar bin:

Seîd Beg kî bû û bi kîjan rola siyasî, civakî û sembolî di nava civaka Êzîdî ya Dasinan de rabû?

Bedirxan Beg di çarçoveya siyaseta Osmanî ya sedsala 19'an de çawa tê dîtîn û bandora wî li ser bûyerên li Dasinan û Ridwanê çî bû?

Siyaseta dewleta Osmanî ya navendîkirinê di salên 1830–1840'î de çawa şertên şer û têkçûna li herêma Dasinan amade kir?

Devera çemê Ridwanê çî giringiya cografî û stratejîk hebû ku ew bû cihê şer û têkoşînê?

Çavkaniyên Elmanî û gerokên Ewropî bûyerên 1838'an çawa nîşan dane û em çî cudahiye di navbera belgeyên Osmanî û folklorê Kurdî de dibînin?

Stranên dengbêjan û çirokên gelêrî, gelo bûyerên elaqedarî Seîd Begê û şerê Dasinan çawa parastin, guhertin û ev çawa dikare bi belgeyên dîrokî re li ber hev were girtin?



Bedirxan Beg

Rûdanên siyasî û guhertinên herêmî

Di sala 1838'an de, dewleta Osmanî di bin desthilatdariya Sultan Mahmud II (1808–1839) de bû. Ew dem, yek ji demên herî giring ên guhertinên siyasî yên dewleta Osmanî bû. Hingê desthilatdariyê bi awayekî fermî hewl da ku strukturên adetî yên herêmî (mîr û beg) bişikîne û wan bi rêveberiya navendî ve girê bide. Ev politikaya ku bi navê navendîkirinê tê zanîn, mercên ku li herêman bi şer were sepandin, amade kirin (Van Bruinessen, 1992, rr. 170–175).

Di heman demê de, dewleta Osmanî bi gefeke mezin re rû bi rû bû, serhildana Mihemed Elî Paşa ya Misrê zexteke mezin lê dikir. Dewleta Osmanî bi awayekî rasterast neçar bû ku hêza xwe li nav herêmên dîr zêde bike û bi kesayetîna herêmî yên bi hêz ên weke Bedirxan Begê hevbendiyên bi şert û merc ava bike (Van Bruinessen, 1992, rr. 168–176).

Di vê çarçoveyê de, Bedirxan Beg wek kesaye-

tekî herêmî yê ku dikare asayîş û kontrolê li Botan û derdorê wê bi rê ve bibe, ji aliyê Osmanîyan ve wek aliyekî stratejîk hate pejirandin. Lê ev pejirandin bi şert bû: Bedirxan Beg divê herêmên ku li dora Botanê ne û wek biguman têne dîtîn (weke herêmên Êzîdîyan û devera Xerza), bi hêza zorê bike bin kontrolê (Layard, 1849, rr. 160–165).

Herêmên Dasinan û Şêxan ên ku xelkê wê û mîrên wê Êzîdî bûn û bi şertên xwe yên olî û civakî jî strukturên Osmanî cuda bûn, di vê şertê de wek herêmên xeter hatine nîşandan.

Bi vî awayî, şerê Dasinan, encama sê şertên bi hev ve girêdayî bû:

- 1) Şertên navxweyî yên dewleta Osmanî: Merkezkîkirin û reform; serdema tanzîmatan.
- 2) Şertên derve yên geopolîtîk: Gefa Mihemed Elî Paşayê Misrê.
- 3) Şertên herêmî: Rola Bedirxan Beg û herêmên Êzîdîyan.

■ **Bêdengî bi xwe jî belgeyek e. Ew nîşan dide ku bi şert û mercên dijwar ka çawa folklor tê qutkirin. Dema ku em lêkolînên li ser Dasinan ji aliyê dîrok û wêjeya gelêrî ve bi hev re bixwînin, belgeyên nivîskî bi têgihîştina bêdengiyê ya wêjeya gelêrî temam dibin.**

Mîrîtiya Dasinan beriya Şer

Berî ku şerê sala 1838'an li devera Dasinan û çemê Ridwanê bi awayekî fermî dest pê bike, herêma di bin mercên têkçûna siyasî û leşkerî de bû. Polîtîkaya navendîkirinê ya Osmanî, şertên fermî çêkirin, Bedirxan Beg ew şert bi hêza xwe ya herêma bi pratîkê sepand, û civaka Êzîdî, bi serokatiya Seid Begê, di navbera têkçûn û berxwedanê de ma.

Seid Beg wek serokekî herêma yê Êzîdîyan, ne tenê bi rola siyasî lê her weha bi rola civakî û sembolî jî rabû. Di wê demê de ya ku navbera dewlet û serokên herêma de arîşeyên di asta rûxinê de hene, Seid Beg wek nîşaneyê berxwedan û parastina civaka xwe hingê hate naskirin (Rich, 1836, r. 90–95). Devera Ridwanê bi taybetî ji ber şertên cografî û stratejîk, bû cihê ku şer lê qewimî (Layard, 1849, rr. 160–165).

Bûyerên di dema şer de

Di dema şerê 1838'an de, Osmanî û hêzên girêdayî Bedirxan Begê, hewl dan ku herêma bi awayekî fermî kontrol bikin, lê li aliyê din civaka herêma, bi serokatiya Seid Begê, berxwedanek nîşan da. Şer li devera Dasinan û çemê Ridwanê ne tenê şerê leşkerî bû, lê her weha şerê desthilatdariyê û nasnameyê jî bû.

Çavkaniyên cuda bûyeran bi awayên cuda nîşan didin:

Belgeyên Osmanî vî şerî, weke tedbîreke asayî û fermî nîşan didin.

Folklor û stranên dengbêjan jî vî şerî weke trajedî û berxwedanê şirove dikin, hem jî bo aliyê

Seid Begê û hem jî ji bo aliyê Bedirxan Begê.

Çavkaniyên Elman û Ingilîz, li gorî wezîfeya kesê nivîskar, şertên şer bi awayekî ku aliyekî sêyem bin rave dikin, lê belê ew bi çavê nasnameya wan a kolonyalist hatine nivîsîn (Weke nimûne binihêre li Von Moltke, 1845, rr. 45–48)

Encama şerî û bandorên piştî şerî

Piştî şerê 1838'an, herêma di bin şertên guhertîneke mezin de ma. Li aliyê Osmanîyan, ev şer wek serketîneke fermî hate nîşandan, lê li aliyê civaka Êzîdî, ew wek şikestin û birîneke dîrokî di bîra komelî de cih digire. Desthilatdariya herêma kêm bû ya Êzîdîyan li Dasinan şikest-, kontrola Osmanî zêde bû, û folklor bû alava sereke ya parastina bîra bûyeran (Fuccaro, 1999, rr. 30–35).

Neguncawbûna mercên parastinê (piştî şer) bi awayekî tund xuya bûn, herêma Dasinan tîk çû, koçberî, kuştin, tîkçûna malbatî ji encamên şerî bûn û mercên ku herêma were parastin jî neman.

Bêdengiya beramberî şerê li dijî Dasinan

Em jî sernavê jor yanî Bêdengiya beramberî şerê li dijî Dasinan, pê dihisin ku şerê Dasinan ê 1838'an tevî giringiya xwe ya dîrokî û civakî jî di wêjeya gelêrî ya Kurdistan de zêde nehatiye dîtîn, û qet nebe îro em nabînin. Bêdengiya wêjeya gelêrî li vir ne bi wateya nebûna îcrayan e; lê em bahsa kêmbûna stran, kilam, çîrok û gotinên gelêrî yê tomarkirî yê li ser vî şerî dikin.

Yanî maneya bêdengiyê li vir em dikarin wiha rave bikin: Ne ku bûyer qet nehatine gotin, lê di koç û diwanên dengbêjan de bi gewde nebûne weke stranên şer, kilamên serhildanê, destanên xwecihî.

Gava em behsa wêjeya gelêrî jî dikin, em behsa pergalên gotinî û hûnermendî dikin yê ku gel wan bi stran, çîrok, qewl, gotinên rojane dibêjin û ew jî bûyerên mezin şirove dikin.

Herçî wêjeya gelêrî ya li ser bûyerên Dasinan e, bi kilamên dengbêjî kêm hatiye tomarkirin, bêhtir weke çîrokên gelêrî, gotinên bîranîne û şewazên belgeyî hatiye veguhastin.

Em jî xwe bipirsîn ka çima em dengê şerê Dasinan di wêjeya devkî de nabihîsin? Bi ya min yek ji sedeman zor û tîkçûn e: Şer û peyama wî bi şertên tund (kuştin, koçberî, talan) çêdibû. Sedemeke din jî kontrol û tîkçûnên siyasî bû: Di şertên dewleta Osmanî û aktorên herêma de, gotina gelêrî tê sînordarkirin yan jî tê şikandin.

Sedemeke din jî dikare guhertina navenda wêjeya gelêrî be: Hin bûyer bi navê kesayetên din (mîr, serok, şerên Botanê) di destanên din de hatine gotin, lê Dasinan bi navê xwe kêm xuya bûye. Weke sedemeke din em dikarin behsa guhertina cîhana gotinê bikin: Bûyerên di şerê Dasinan de zêdetir di belgeyên dîrokî de (rêwîtiyên Ewrûpiyan, rapor, bîranînan) de mane, ne di gotinên gelêrî de.

Li vir dikarin behsa wê yekê bikim ku Luqman Guldivê ji min re got, wî îcrayek ji nava şairên Goyan sala 2003'yan berhev kiriye. Gava wî şair razî kiriye ku vê îcraya li ser Seid Begê bibêje, şair gotiyê ew naxwaze êdî van îcrayan bibêje ji ber ku ew behsa şaşiyên berê, dijminatîya di navbera Misilman û Êzîdîyan de dike. Ev jî nîşan dide ku bîreweriya welatparêziya Kurdistan û neteweperweriya wan jî dibe sedem ku ev îcra êdî zêde neyên gotin.



Helmut von Molke

Di encamê de bêdengî xwe bi xwe jî belgeyek e. Ew nîşan dide ku bi şert û mercên dijwar ka çawa folklor tê qutkirin. Dema ku em lêkolînên li ser Dasinan ji aliyê dîrok û wêjeya gelêrî ve bi hev re bixwînin, belgeyên nivîskî bi têgihîştina bêdengiyê ya wêjeya gelêrî wê temam bibin. Heke kilam û çîrok kêm in, şiroveya bêdengiyê xwe bi van pirsan digihîne jînwarekî zanistî: Çima nehatine gotin? Kê/Çi bêdeng kir? Di kîjan şertan de ev bêdengî çêbû?

Weke encam

Ev kurtelêkolîn diyar dike ku bûyerên sala 1838'an li herêma Dasinan û devera çemê Ridwanê, ne bûyerên hêsan û bi yekaliyî bûn, lê encama tîkiliya şert û mercên siyasî, herêma û civakî bûn. Polîtîkaya navendîkirina dewleta Osmanî di nîvê yekem ê sedsala 19'an de tevî siyaseta reformên tanzîmatê, şertên ku desthilatdariya serokên herêma were sînordarkirin amade kirin. Di vê çarçoveyê de Bedirxan Beg weke aktorekî herêma yê bi hêz di navbera fermana Osmanî û armancên xwe yê siyasî û desthildarî de bi roleke giring rabû.

Seid Beg, di bîra komelî ya Êzîdîyan de weke sembola rûmetê û lê her wiha şikestinê ma, û ev bîranîna komelî, her çend ne bi kilamên dengbêjî, lê bi şewaza bêdeng a wêjeya gelêrî heta îro jî tê veguhastin. Ji bo serwestbûna li bûyerên weke şerê Dasinan, pêdivî ye ku wêjeya gelêrî ne bi şertê ku bi stran be, lê bi şertê ku weke şewazekî bîra komelî û veguhastina têgihîştinê be were fêmkirin.

Çavkani

Ak, W. (Amadekar) (2016). Çil Kelatên Kurdistanê, Çîrok, Awaz û Stran. Van: Şaredariya Bajarê Mezin.

Fuccaro, N. (1999). The Other Kurds: Yazidis in Colonial Iraq. London: I.B. Tauris.

Layard, A. H. (1849). Nineveh and Its Remains (Vol. I). London: John Murray.

Rich, C. J. (1836). Narrative of a Residence in Koordistan (Vol. II). London: James Duncan.

Van Bruinessen, M. (1992). Agha, Shaikh and State. London: Zed Books.

Von Moltke, H. (1845). Letters on the Conditions and Events in Turkey. London.

* Xwendekara bernameya mastera Ziman û Wêjeya Kurdî li Zanîngeha Kobanê



Şervanekî Êzîdî

Dem dema avakirina Jiyana Azad e



Zagros HİWA

Rewşa Îranê her ku diçe aloztir dibe. Pergala desthilatdar a kû li ser Îranê hukim dike, hem ji aliyê gelên Îranê û hem jî ji aliyê hêzên navdewletî nayê pejrandin. Ev pergala ku piştî Şerê Cihanê yê Yekemîn hatiye damezrandin û di sala 1979'an de rengêkî dîni li xwe kir, êdî ne dikare ji daxwazên gelên Îranê re bibe bersiv û ne jî dikare li gel pergala cihanî bibe yek. Ji ber vê yekê, rewşa Îranê her ku diçe ber bi teqînêkê ve gav diavêje.

Gelên Îranê xwedî paşxaneyêke pîr dewlemend a felsefî, çandî û dîrokî ne. Ev gel zû bi zû zordarî û zordestiyê napejirînin û her tim jî bo azadiyê têkoşiyane. Di dîrokê de gelek kesayetên weke Babek, Mezdek, Ebu Muslîmê Xorasanî, û wekî din li dijî zordariyê li dijî desthilatdaran têkoşiyane. Di dîroka nêz de jî gelên Îranê hem li dijî pergala paşatî -şahi- û hem li dijî pergala olperest rabûne. Gelên Îranê her tim jî bo demokrasîyê û azadiyê di nava têkoşînê de bûne û di vî warî de gelek berdêlên giran dane. Em dikarin bibêjin, di serdema nêz de yekem bihara Rojhilata Navîn di sala 1979'an de li Îranê çêbû. Lê çawa kû hêzên navdewletî bi rêya DAIŞ'ê bihara Ereban jî rê derxistin û kirin bela li ser tevahiya mirovahiyê, bihara gelên Îranê jî bi rêya Ayetollayan jî rê derxistin û kirin belayek li ser gelên Îranê hemûyan. Bûna desthilat a Xumeynî weke dij-şoreşekê bû li dijî rabûn û serîrakerîna gelên Îranê.

Her car xurttir ji berê

Ji sala 1998'an û pê ve, gelên Îranê bi pêşengtiya jin û ciwanan li dijî sîstema Ayetollahan di nava berxwedanê de ne. Her kû dijmin berxwedanekê ditepisîne, berxwedan û rabûna piştî wê pîr mezintir çêdibe. Weke mînak, piştî kû berxwedana "Jin, Jiyana, Azadî", bi rêya bikaranîna tundûtûjiyê û heta bi çekên kîmyewî li dijî jinên ciwan hat tepisandin, vê carê di sala 2025'an de gelên Îranê raperîneke mezintir li dar xistin û bingehên esasî ên rejîmê hejandin. Taybetmendiyê herî sereke ya vê raperîna dawî ew e ku çîna "bazirgan" pêşengtiya wê kir. Çîna "bazirgan" ew çîna kû heta niha rejîmê xwe bi wê li ser pêyan girtibû. Ji ber vê yekê rejîma Îranê di rojên 8-10'ê Çileyê îsal de bi awayekî hovane êrişî gel kir, komkujiyê mezin pêk ani ku di dîroka nêz û dûr a Îranê de mînaka wî tine ye. Ev komkujiya ku rejîma Îranê li ser millet da meşandin, ji komkujiyên DAIŞ'ê bi dehan caran mezintir e. Li gorî hin çavkaniyên ji

nava Îranê di nava 2 rojan de zêdetirî 30 hezar kes hatine kuştin û zêdetirî 70 hezar kesan jî hatine birîndarkirin. Hê jî bi hezaran kesên girtî, metirsiya bidarvekirinê li ser wan heye. Rejîmê, ji bo ku raya giştî a cihanê jî ve komkujiyê agadar nebe, internet bi temamî qut kir û hê jî ev qedexa dewam dike.

Rejîm êdî ne rewşa ye

Ev komkujî ve rastiyê radixe ber çavan ku ti rewayetîya rejîma Ayetollahan li Îranê êdî nemaye. Ev rejîm di qeyraneke kûr a îdeolojîk, civakî, siyasî, aborî û kultûrî re derbaz dibe. Ya eşkere ew e ku ve rejîmê êdî temenê xwe temam kiriye û eger bimîne jî wê tenê bi riya tundûtûjiyê û komkujîyan bimîne. Ji derveyî rêjeyêkê kêma êdî çî kes li Îranê ve rejîmê qebûl nake. Ev rejîm jî ji bo bimîne amade ye ku bi çavsorî her cureyê komkujîyan pêk bîne. Dîroka rejîma Îranê, dîroka komkujîyan e, bi komkujî, êşkence û bidarvekirinê xwe li ser pêyan digire. Lê li Îranê xelk azadiyê dixwaze û teslîm nabe. Ev komkujî mumkin e ku ji bo demeke kurt bandorekê bikin, lê rabûn û serîrakerîna piştî wê, wê bi heybetti ji yêmn beriya xwe be.

Pêwîst e em wê xalê zelal bikin ku rejîma heyî ya

■ **Dîroka rejîma Îranê, dîroka komkujîyan e, bi komkujî, êşkence û bidarvekirinê xwe li ser pêyan digire. Lê li Îranê xelk azadiyê dixwaze û teslîm nabe. Ev komkujî mumkin e ku ji bo demeke kurt bandorekê bikin, lê rabûn û serîrakerîna piştî wê, wê bi heybetti ji yêmn beriya xwe be.**


Îranê bi destê hêzên derve hatiye destnîşankirin. Rejîmê beriya wê jî bi heman rengî bûn. Ingilîzan Reza Şah anîn Îranê. Dîsa Ingilîzan ew jî Îranê birin û heta mirinê li giravekê hiştin. Ingilîz û Emerîkiyan Mihemed Reza Şah anî ser desthilatdariyê. Ingilîz û Emerîkiyan, ji bo parastina Mihemed Reza Şah li hember Dr. Mihemed Musaddîq darbeya eskerî çêkir. Piştî kû serhildana gel cih li Mihemed Reza Şah teng kir, yê ku Xumeynî anîn ser desthilatdariyê jî her heman hêz bûn. Û heman hêz heta niha jî ev rejîm li ser pêyan hiştine. Kêra ve rejîmê jî bo DYE û YE'yê ew e ku dikare bi gotareke dîni, geşedanên demokratîk hemûyan li Îranê bitepisîne. Heta niha her ku gelên Îranê rabûne, hêzên derve li şûna ku alîkariyê bidin gel, alîkarî dane rejîmê. Ev bi eşkereyî di serhildana 2009 û ya 2022'yan de hate dîtin. Wan nedixwest ku rejîm birûxe. Ji ber ku ew hêz demokratîkbûna Îranê û Rojhilata Navîn naxwazin. Ew tenê li pey berjewendiyên xwe ne.

Gel azadiyê dixwaze

Hêzên hegemonîk kara bêsînor

Sedema nerazîbûna gelên Îranê û hêzên derve li hember Îranê ne yek e. Her yek armanceke xwe ya cuda heye. Gelên Îranê, azadî û demokrasîyê dixwazin. Lê hêzên derve dixwazin ku sîstema Îranê, bi darê zorê yan jî bi rêya diplomasiyê, li gorî berjewendiyên xwe careke din bi rêxistin bikin. Di çarçoveya Şerê Cihanê yê Sêyemîn de hêzên hegemonîk ên cihanê dixwazin ti astengî li hember gera sermayeyê û berjewendiyên wan çênebe. Ji ber vê yekê dixwazin tevahiya dewletên ku ne li gorî berjewendiyên wan hêza ne, di nava sîstema xwe de entegre bikin. Ti peywendiya van hêzan bi têkoşîna azadî û demokrasîyê ya li Îranê re tine ye.

Heger Îran li hember hêzên hegemonîk ê cihanê şer bike, wê wenda bike, têk biçe. Ji ber ku hem weke paradijma û hem weke aborî û serbazî, hêza wê têra berevaniyê nake. Ev mijar di şerê 12 rojan de xweşik diyar bû. Di demekê de ku hîmên rejîmê hemû tûşî darrişin û hilweşandin bûne, ew nikare tenê bi teknolojiya xwe ya fuzeyan li hember hêzên hegemonîk bisekine. Heger Îran daxwazên hêzên hegemonîk ên dinyayê qebûl bike, ev ê bibe binketina wê. Ji ber ku Îranê stratejiya xwe hemû, li ser bingehê çekên atomî û hêzên wekîl ava kiriye. Heger dest ji wan tiştan berde, êdî ti hêza wê namîne ku xwe li ser pêyan bigire. Jixwe, di wan mijaran de jî sala 2020'an û pê ve, gelek derbên giran li Îranê hatine xistin.



■ Di vê pêvajoyê de ya herî giring ew e ka gelên Îranê û bi taybetî gelê Kurd, bêyî ku hêviyên xwe hemûyan bi destwerdana hêzên derve ve girê bidin, li ser bingehe dewamkirina li ser rêûresma şoreşa Jin Jiyan Azadî, karibin têkoşîna xwe ji bo demokrasiyê bilind bikin. Dengê hilweşîna sîstema dîktatoriyê ya sed salî niha tê guhê her kesî.

Sê senaryoyên muhtemel

Niha ji bo destwerdana li Îranê behsa sê senaryoyên bingehîn tê kirin. Ya yekê, hilweşandina rejîmê bi rêya êrişên leşkerî û li ser textê desthilatê danîna Kurê Mihemed Reza Şah e. Ev bijarte, metirsiyên xwe ji bo hêzên hegemon heye. Ji ber ku mumkin e, nikaribin wê valatiya desthilatê dagirin. Gelên Îranê ku beriya bi 47 salan Mihemed Reza Şah qewitandin, niha naxwazin kurê wî ji nû ve bibe desthilat. Wekî din, hêzên hegemon ditirsin ku ji ber hilweşîna rejîma Îranê, sistemeke demokratîk ava bibe ku daxwazên wan hêzan hemûyan qebûl neke. Em ji bîr nekin ku Tom Barak gotibû: “modela herî baş ji bo rojhilata navîn dîktatorên xêrxwaz in”!

Senaryoya duyem, tasfiyekirina hin serkirdeyên rejîmê û danîna çend kesên alîgirê DYE û YE’yê li şûna wan e. Hêzên hegemonîk dixwazin vê yekê ji bi rêya operasyonên cerahî pêk binin. Rejîma Îranê, niha tedbîrên vê senaryoyê girtine. Gelek kesên ku


weke muhtemel e yanî potansiyeka wan heye ku bi bin alternatîfa desthilata hevi, di zindanê de ne.

Senaryoya sêyem jî ew e ku rejîma Îranê weke xwe bimîne, lê daxwazên hêzên hegemon hemûyan qebûl bike. Rayedarine rejîmê, dizanin, heger sîstema wan hilweşe ti rêya jiyane ji wan re nîne. Ji ber vê yekê, îhtîmal heye ku xwe teslîmê daxwazên hêzên hegemon bikin, di nava sîstema hegemon a navdewletî de entegre bibin û desthilata xwe dewam bikin.

Di vê pêvajoyê de ya herî giring ew e ka gelên Îranê û bi taybetî gelê Kurd, bêyî ku hêviyên xwe hemûyan bi destwerdana hêzên derve ve girê bidin, li ser bingehe dewamkirina li ser rêûresma şoreşa Jin Jiyan Azadî, karibin têkoşîna xwe ji bo demokrasiyê bilind bikin. Çawa ku di şoreşa Jin Jiyan Azadî de hate dîtin, gelê Kurd dikare ji guhertinên demokratîk û guhertinên zihniyetî û çandî re li Îranê pêşengitiyê bike. Di serhildanên herî dawî de ji gelê

Kurd li Rojhilatê Kurdistanê de li bajarên weke Kirmaşan, Îlam, Abdanan, Hemedan, Xorremabad, Melekşa de bi awayêkî herî aktîf beşdarî şoreşê bû. Êdî dema wê hatiye ku bi rêxistinbûna li ser bingehe Neteweya Demokratîk û Xweparastinê, pîrsgirêka Kurd li Îran û Rojhilatê Kurdistanê çareser bibe. Dengê hilweşîna sîstema dîktatoriyê ya sed salî niha tê guhê her kesî. Dem dema avakirina sistemeke demokratîk û jiyana azad e.





*ey pakrewan
ey birûsk qîza birûskan
ez ê hemû stêrkên li ezmanan
ji bo sedeqeya serê te
belav bikim ji dêvla xêran
ez ê hemû çiyayên çîçilaskî
bi dora serê te bigerînim
ji te re bikim qurban*

(Rênas Jiyan)